

Josué

A'ti pūrī a'tiro weero ojano'pā nise ni'i

Moisé wērīca be'ro Ō'acū Josuére Israe curuacjārārē sū'ori nisetiacjare sōrōcū niwī. Josué cū ojāca pūrī puaro ducawati'i. Nimū'tārō Israe curuacjārā na Canaá di'ta, Ō'acū narē o'oguti nīca di'tare sājāa, tocjārā me'rā a'mewējē, wapata'a, miiwapa'que ni'i. (Capítulos 1–12) Be'rocjārō na Israe curarinacū di'ta ducawaa'que ni'i. (Capítulos 13–22) Nituroo Josué cū ucūtuo'que, cū masārē werecasatuo'que, tojo nicā cū wērī'que ni'i. (Capítulos 23–24)

Ō'acū Josuére Israe curuacjārā wioḡu sājācā wee'que ni'i

¹ Be'ro Moisé, Ō'acū dutisere da'raco'te'cū wērīca be'ro, Ō'acū Josuére ucūcū niwī. Josué pe'e Nun wāmetiḡu macū, tojo nicā Moisére weetamuco'te'cū nicū niwī. Ō'acū cūrē a'tiro ni ucūcū niwī:

² “Moisé yu'u dutisere wee'cū wērīa wa'ami. Ni'cārōacāma mū'u pe'e nipe'tirā Israe curuacjārārē dia Jordārē sū'ori pē'agūsa'a majā. Yu'u mūsārē o'omatji di'tapu wa'arāsa'a.

³ Yu'u Moisére ‘A'tiro weeguti’ ní'caronojōta mūsārē weegusa'a. Yu'u nipe'tiro mūsā di'ta sijatjo ejaturoo o'oguti.

⁴ Di'ta a'tocã'rõ yoaro o'oguti. Yucu marĩrõpũ, téé Líbano di'tapũ nituorosa'a. E'saro pe'e maa yoari maa Éufrates, nipe'tiro hitita masã ye di'ta me'rã ninũ'cã, téé pajiri maa Mediterráneo nirõpũ nituorosa'a.

⁵ Ne ãpẽrã mũsã me'rã a'mewẽjẽrã põtẽosome. Moisé me'rã ní'caronojõta mejãrõta nigũsa'a mũ'u me'rã quẽ'rãrẽ tja. Ne mũ'urẽ cõ'asome.

⁶ Tojo weegu wãcũtutuaya, uiro marĩrõ nisetiya. Na ñecũsumuarẽ 'A'ti di'tare o'oguti', niwĩ. Mũ'u narẽ sũ'ori mia, na me'rã a'ti di'tare miiwapa etigusa'a.

⁷ Tojo weegu yũ'u ní'caronojõ wãcũtutuanu'cũcã'ña. Tojo nicã nipe'tise Moisé mũsãrẽ dutise cũu'quere weepe'ocã'ña. Tojo weegu nipe'tise mũ'u weesetise añurõ wa'arosa'a.

⁸ Yũ'u dutise cũu'quere masãrẽ bu'enu'cũcã'ña. Ñamirĩnũcũ, umũcori quẽ'rãrẽ wãcũnũrũnu'cũcã'ña. Tere weecã, nipe'tise mũ'u weesetise queoro wa'arosa'a.

⁹ Yũ'u mũ'urẽ a'tiro dutiapũ. Ne mũ'urẽ mejẽcã wa'acã uiticã'ña. Wãcũtutua nisetiya. Yũ'u Ô'acũ, mũ'u wiogu, mũ'u me'rã ninu'cũcũsa'a. Mũ'u ño'o wa'aro mũ'u me'rã wa'agusa'a", nicũ niwĩ Ô'acũ.

*Josué Canaá di'tacjãrã me'rã cũ
a'mewẽjẽatjere apoyu'que ni'i*

¹⁰ Be'ro majã Josué Israe curuacjãrã wiorãrẽ a'tiro weeduticũ niwĩ:

11 “Nipe'tiro masã cãrĩse u'turipũ wa'a weetjãrã, narẽ ‘Ba'ase musã miatjere apoyuya’, nirã wa'aya. Marĩ i'tia nũmũ be'ro dia Jordãrẽ pẽ'arãsa'a. Õ'acũ o'oatji di'tare ñe'erã wa'arãsa'a”, ni werecũ niwĩ narẽ.

12 Rubén ya curuacjãrã, Gad ya curuacjãrã, tojo nicã deco me'rã Manasés ya curuacjãrã pe'ere Josué a'tiro ni ucũcũ niwĩ:

13 —Wãcũña Moisé, Õ'acũ ɥaro weeco'tegũ, musãrẽ duti'quere: Õ'acũ musãrẽ “Sooato” nígũ, a'ti di'ta, musã nirĩ di'tare o'ocũ niwĩ.

14 Musã nũmosãnumiarẽ, musã põ'rãrẽ, musã yarã ecarãrẽ a'to dia Jordã mujĩpũ mujãtiro pe'e cũucã'ña yujupũ. Moisé musãrẽ o'óca di'ta ni'i. Musã nipe'tirã ɥmũa pũrĩcã a'mewējētutuarã nirãnojõ musã wãmo me'rã pẽ'arãsa'a. Musã acawererãrẽ a'mewējētamurã, na dũporo ɥ'mutãña.

15 Téé Õ'acũ musãrẽ soose o'o'caronojõta na quẽ'rãrẽ o'ocãpũ, musã narẽ a'mewējētamudu'urãsa'a. Narẽ Õ'acũ o'oatji di'tare ñe'éca be'ropũ, a'mewējētamutũorãsa'a. Tojo weetu'ajaca be'ropũ musã ye di'ta dia a'ti pã'rẽ pe'e dajatojatirãsa'a. Moisé musãrẽ cũu'que di'tare miiwapa, sãjãque'arãsa'a majã, nicũ niwĩ.

16 Cũ tojo nicã tũ'orã, na pe'e a'tiro ni yũ'ticãrã niwã:

—Nipe'tise mũ'ɥ dutisere weerãti. No'o mũ'ɥ wa'adutiro wa'arãti.

17 Ɔsã Moisé duti'quere queoro yũ'ti'caronojõta mũ'ɥ quẽ'rãrẽ yũ'tirãti. Ɔsã a'te dia'cũrẽ ɥa'a. Õ'acũ Moisé me'rã niwĩ.

Mejārōta cū me'rā ní'caronojōta mu'u me'rā quē'rārē nicā uasā'a.

¹⁸ No'o mu'urē yu'rūnu'cāgūnojō, mu'u du-tiro weetigūnojō wējēno'gūsami. Mu'u pe'e wācūtutua, nisetiya, nicārā niwā Josuére.

2

Josué Jericópu ĩ'adu'tiri masārē o'ó'que ni'i

¹ Be'ro Josué puarā umuarē ya'yioropu Canaá di'tare, Jericópure ĩ'adu'tirā wa'aduticu niwī. Tojo weerā na Sitīpu ní'cārā Jericópu wa'acārā niwā. Ti ñamirē na ni'cō umuarē a'metārāwapata'ari masō Rahab wāmetigo ya wi'ipu sājāa, tojacā'cārā niwā.

² Jericócjū wioḡu “Ní'cācā ñami Israe curu-acjārā marī ya di'tare ĩ'adu'tirā a'tiapārā” nisere tu'obocacā'cu niwī.

³ Tojo weegu cū yarā surarare co ya wi'ipu o'ócu niwī. Ti wi'ipu wa'a weetjārā, core a'tiro nicārā niwā: “Na umua mu'u ya wi'ipu nirārē cō'awīrōña. Na ĩ'adu'tiri masā nima”, nicārā niwā.

⁴ Rahab pe'e narē nuotojaco niwō. Na sērītiña'cā, wioḡu o'ó'cārārē a'tiro yu'tico niwō:

—Diacjāta ni'i. Musā nírōnojōta a'ti wi'ita nimiamā. Na “Tocjārā nima” nisere masītasu.

⁵ Mujīpū sājārī cura, a'ti macā cja sopere bi'atji dūporoacā wa'ama. Diape'e wa'arā wa'apā. Quero wa'abaque'oya. Apetero weerā narē emuejábosa'a, nico niwō.

⁶ Co ya wi'i bu'i opa sira nirōpu ñocāpūrī pō'rā sī'o'que weronojō nise docapu narē nuocūuco niwō.

7 Co tojo nicã t̃uorã, surara maata ti wi'ip̃u wijaa, dia Jordã tirop̃u i'adu'tiri masãrẽ a'marã wa'amicãrã niwã. Na wa'áca be'ro maata ti macã cja sopere bi'ano'caro niwũ.

8 Israe curuacjãrã cãrĩse duporo Rahab narẽ nuo'carop̃u m̃jãa, narẽ nico niwõ:

9 —Ỹu'ũ masĩ'i. Õ'acũ m̃sã Israe curuacjãrãrẽ a'ti di'tare o'otojac̃u niwĩ. Cũ a'ti di'tacjãrãrẽ m̃sãrẽ uicã weecu niwĩ. Tojo weerã ũsã nipe'tirã uibutiasa'a.

10 Õsã t̃u'ow̃u Õ'acũ m̃sãrẽ Egiptop̃u ní'cãrãrẽ miijija'quere. Maa s̃o'arĩ maarẽ acore m̃sãrẽ pẽ'ato ní'gũ, d̃ucawaañu'cõ, boposãjãcã weecu niwĩ. Tojo nicã, p̃uarã amorreo masã wiorã maa Jordã a'ti pã'rẽ pe'e nirã Og, tojo nicã Sehõrẽ wẽjẽpe'ocãrã niwũ.

11 Tojo weerã ũsã p̃urõ uise me'rã m̃sãrẽ i'a'a. Õ'acũ, m̃sã wiog̃u nipe'tiro u'm̃usep̃u, a'ti nucũcãp̃ure wiog̃u nimi.

12 Tojo weego m̃sãrẽ s̃erĩ'i. Õ'acũ wãme me'rã “M̃u'ũ acawererãrẽ añurõ weerãti”, niña. Ỹu'ũ m̃sãrẽ añurõ weetamu'caronojõta weeya. “Diacjũta tojo weerãti” nĩrã,

13 ỹu'ũ pac̃usum̃uarẽ, ỹu'ũ ma'misum̃uarẽ, ỹu'ũ acawererã numiarẽ ỹu'r̃uweticã weeya, nico niwõ.

14 Na core a'tiro ni ỹu'ticãrã niwã:

—M̃u'ũ ní'ronojõta weerãti. Weeticãma, Õ'acũ ũsãrẽ wẽjẽato. M̃u'ũ pe'e marĩ ní'cãrõacã ucũsere ne ãp̃erãrẽ wereticã'ña. Tojo nicã, Õ'acũ a'ti di'tare o'ocãp̃uta, ũsã m̃u'urẽ

añurõ wiopesase me'rã, añurõ pajaña'a, weetamurãsa'a, nicãrã niwã.

¹⁵ Rahab ya wi'i, ti macã yeecã'mota'aca tũ'rũpũ wãñacaro niwũ. Tojo weego narẽ ventana sopepũ pũnũ'mo da me'rã du'udijoco niwõ.

¹⁶ Tojo weetoja, narẽ nico niwõ:

—Mũsãrẽ a'marĩ masã bocari nĩrã, ãrũgũpũ wa'aya. No'o i'tia nũmũnojõ tojayá. Téé mũsãrẽ a'marĩ masã macãpũ dajatojatica be'ropũ mũsã acawererã tiro tojáaya, nico niwõ.

¹⁷ Co tojo nicã tũ'orã, a'tiro ni yũ'ticãrã niwã:

—Mũ'u ãsãrẽ “Yũ'ũre tojo weepa” ní'caronojõta weerãsa'a.

¹⁸ Ësã a'ti di'tare sãjãácãrẽ, sõ'arĩ da pũnũ'mo da mũ'u ãsãrẽ du'udijoca dare ventana sopepũ yoodijoya tja. Mũ'u ya wi'ipũ mũ'u pacũ, mũ'u paco, mũ'u ma'misũmũa, nipe'tirã mũ'u acawererãrẽ neocũũña.

¹⁹ No'o ní'cũ cũ ãaro wijaama'agũnojo cũ basu cũrẽ wẽjẽsere bu'iritigũsami. Ësã bu'iri moorãsa'a. Ní'cũ ãsãnojo mũ'u ya wi'ipũ nirãrẽ mejẽcã weecã pũrĩcãrẽ, ãsãta bu'iritirãsa'a.

²⁰ Mũ'u ãpẽrãrẽ werecãma, marĩ ucũ'que wapamarĩrõsa'a, nicãrã niwã Rahare.

²¹ —Jau. Mũsã ní'rõnojo tojota weegosa'a, ni yũ'tico niwõ.

Be'ro tojo nitojanũ'cõ, wa'a wa'acãrã niwã. Na wa'áca be'ro co na weeduti'caronojõta weeco niwõ. Pũnũ'mo da, sõ'arĩ dare ventana sopepũ du'teõ'odijoco niwõ.

²² Be'ro na pũarã Israe curuacjãrã ï'adu'tiri masã ãrũgũpũ du'ticãrã niwã. Topũre i'tia

nũmũ tojacārã niwã. Narẽ a'marã, surara pe'e nipe'tiropũ a'macũmí, ne bocaticārã niwã. Tojo weerã Jericópũ dajatojaa wa'acārã niwã.

²³ Be'ro ĩ'adu'tiri masã ũrũpagupũ ní'cārã di-jaa, maarẽ pẽ'aa, téé Josué tiropũ dajacārã niwã tja. Topũ daja, cũrẽ nipe'tise narẽ wa'a'quere werecārã niwã.

²⁴ A'tiro ni werecārã niwã: “Õ'acũ marĩrẽ ‘Nipe'tise ti di'tare o'oguti’, nitojami. Na masã ti di'tapũ nirã marĩrẽ pũrõ uibutiarã weema”, ni quetiwerecārã niwã.

3

Israe curuacjārã dia Jordārẽ pẽ'a'que ni'i

¹ Ape nũmũ pe'e, bo'reque'ari cura Josué nipe'tirã Israe curuacjārã me'rã Sitim wãmetiropũ ní'cārã dia Jordãpũ bu'atacārã niwã. Na diare pẽ'ati duporo ti maa sumutopũ tojaque'acārã niwã.

² ĩ'tia nũmũ yũ'rúca be'ro surara wiorã, nipe'tirã wa'teropũre wa'a weetjĩarã,

³ a'tiro duticārã niwã: “Musã pa'ia, Leví ya curuacjārã Õ'acũ ‘Masã me'rã añurõ weeguti’ ní'quere cœori acarore na miacã ĩ'arã, na siro sirutuya.

⁴ Tojo weerã musã wa'arore masĩrãsa'a. Musã ne ni'cũ a'ti ma'apũre wa'aña'tisa'a. Ti acarore yoacurero, ní'cã kilómetronojõ sirutuya. Pũ'toacã tu'aticã'ña”, ni werecārã niwã.

⁵ Tere na wéréca be'ro Josué a'tiro nicũ niwĩ tja: “Ñamiacã Õ'acũ cũ tutuasere ĩ'arãsa'a. Tojo weerã musã Õ'acũ ĩ'orõpũ ña'ase marĩrã niato

nirá, masã ye su'tire coe, tojo nicã masã ya upure u'acoecã'ña", nicu niwĩ Josué.

⁶ Pa'ia pe'ema a'tiro nicu niwĩ: "Mũsã pa'ia Õ'acũ 'Masã me'rã añurõ weeguti' ní'quere cõori acarore wua, masã nipe'tirã dũporo maarẽ u'mutãpẽ'arãsa'a."

Tojo weerã cũ duti'caronojõta ti acarore wua, masã dũporo u'mutãcãrã niwã.

⁷ Be'ro Õ'acũ Josuére a'tiro nicu niwĩ: "Ni'cãcã me'rã nipe'tirã Israe curuacjãrãrẽ mu'arẽ ãpẽrã yu'rũoro añurõ ï'acã weenu'cãgũti. Tojo weerã Moisé me'rã ní'caronojõta yu'u mu'u me'rã nisere masĩrãsama.

⁸ Pa'ia yu'u 'Masã me'rã añurõ weeguti' cõori acarore miarãrẽ a'tiro ni wereya: 'Mũsã dia Jordã sumutore etarã, ti maapure ñumuwija, tojanu'cãña' ", nicu niwĩ Õ'acũ.

⁹ Be'ro Josué masãrẽ pijio, nicu niwĩ: "Tu'orã a'tia marĩrẽ Õ'acũ nisere.

¹⁰ A'tiro weemasĩrãsa'a 'Õ'acũ catigu marĩ me'rã ninu'cũmi' nisere. Tojo nicã a'ti di'tacjãrã cananeo masã, hitita masã, heveo masã, ferezeo masã, gergeseo masã, amorreo masã, jebuseo masãrẽ cõ'ape'owã'cãgũsami.

¹¹ Ì'aña. Õ'acũ, nipe'tise di'ta wiogu ya acarore mũsã dũporo dia Jordãrẽ pẽ'amũ'tãrõsa'a.

¹² Tojo weerã mũsã Israe curuacjãrã doce curari nirã, te curarinucũ ni'cũrẽ beseya.

¹³ A'tiro wa'arosa'a. Na pa'ia Õ'acũ nipe'tise di'ta wiogu ya acarore miarã, na diapũ ñumuwijacã, te aco dũcawatia wa'arosa'a. Te

aco nimi'que o'maburosome. Puaperiputa opa ditara weronojõ nicã'rõsa'a", ni werecu niwĩ.

14 Tojo weerã Israe curuacjãrã dia Jordãrẽ pẽ'arã, na cãrĩ'que u'turire wijacãrã niwã. Pa'ia Õ'acũ "Masã me'rã añurõ weeguti" ní'quere cõori acarore na dũporo miamũ'tãcãrã niwã.

15 Titare masã otese dũcatiri cura dia Jordã pa-jiro pu'eeja, mirĩa wa'acaro niwũ. Tojo nimicã, pa'ia ti acarore miarã, Jordãpũ na dũ'pocãrĩ ti maarẽ u'tacũucãta,

16 te aco bu'ipũ buruti'que tojanũ'cãcaro niwũ. Yoaropũ ni'cã macã Adã wãmetiri macãpũ opa ditara bi'a cã'mota'a'ro weronojõ wa'acaro niwũ. Adã Saretán wãmetiro pũ'topũ tojacaro niwũ. Aco tosiropũ toja'que pe'e O'maburotiri ditarapũ wetibũrudijacarõ niwũ. Tojo wa'acã, na Israe curuacjãrã Jericó põtẽorõ pẽ'acãrã niwã majã.

17 Na pẽ'arĩ cura pa'ia Õ'acũ ya acarore cõorã pe'e dia deco boporopũ nu'cãejacã'cãrã niwã. Téé nipe'tirã Israe curuacjãrã pẽ'ape'tica be'ropũ pẽ'acãrã niwã. Nipe'tirã Israe curuacjãrã boporopũ pẽ'acãrã niwã.

4

Ëtãpaga docepagare dia Jordã cjasere mii'que ni'i

1 Nipe'tirã dia Jordãrẽ pẽ'atãca be'ro Õ'acũ Josuére nicũ niwĩ:

2 "Israe curuacjãrãrẽ te doce curarinucũ ni'cãrẽ beseya.

3 Narē wa'aduti weetjāgũ, pa'ia dia deco na nu'cūrō tiropu docepaga ũtāpagare miicūudutiya. Mūsā ni'cācā űami cārīatjopu tepagare cūña.”

4 Tojo weegu Josué doce umuarē cū bese'cārārē pijio,

5 narē nicu niwĩ: “Mūsā Jordā decopu, Ő'acū mūsā wiogu ya acaro tiropu wa'a, mūsānucū ũtāpaga ni'cārēpaga wuarā wa'aya. Tojo weerā mūsā docepaga cuorāsa'a.

6 Te tojo weesere mūsā pō'rā masābajuarāpu, 'A'tepaga ¿de'ro nisī'rīrō weeti?' nicā, mūsā a'tiro ni yu'tirāsa'a:

7 'Īsā Ő'acū ya acarore dia Jordārē miipē'acā, ne aco marīrī maa wa'awu. A'tepaga Israe curuacjārā doce curari ti maa Jordārē pē'awũ', nisī'rīrō wee'e, ni wereapa mūsā pō'rārē”, nicu niwĩ.

8 Tojo weerā na Josué cū weeduti'quere queoro weecārā niwā. Na ũtāpaga docepaga Jordā decopu ní'quepagare miīwñacārā niwā. Israe curuacjārā te curarinucū ni'cū ni'cārēpaga miacārā niwā. Ő'acū Josuére ní'caronojōta na cārīrōpu tepagare mia, cūucārā niwā.

9 Apeyere tja Josué ti maa decopu pa'ia na Ő'acū ya acarore wñanu'cū'caropure apeyepaga docepaga cūucū niwĩ. Tepaga topu nidecoti'i yujupu.

10 Téé nipe'tise Ő'acū Josuére duti'quere weepe'óca be'ro, pa'ia ti maa decopu ti acarore wñanu'cūcārā niwā yujupu. Moisé Josuére

weeduti'caronojõta queoro weecārã niwã. Masã pe'e sojaro me'rã ti maarẽ pẽ'acārã niwã.

11 Nipe'tirã masã na pẽ'aejanu'cãca be'ro pa'ia Õ'acũ “Masã me'rã tojo weeguti” ní'quere cuori acarõ me'rã pẽ'a, masã dũporo nu'cãejacãrã niwã.

12 Ëmua Rubén ya curuacjãrã, Gad ya curuacjãrã, tojo nicã deco me'rã Manasés ya curuacjãrã na wãmo me'rã ãpẽrã Israe curuacjãrã dũporo pẽ'amũ'tãcãrã niwã. Tojo weerã Moisé cũ duti'caronojõta weecārã niwã.

13 Pãjãrã cuarenta mil a'mewẽjẽrĩ masã añurõ wãmotirã nu'cãejaburocãrã niwã. Jericó opa pa'tiro nirõpu wa'a, a'mewẽjẽrãtirã apoyucãrã niwã. Ti acarõ topu niyucã, Õ'acũ na me'rã nicu niwĩ.

14 Na tojo weeri numãrẽta nipe'tirã Israe curuacjãrã ã'orõpu Õ'acũ Josuére ãpẽrã yu'rũoro tojacã weecu niwĩ. Cũ catiri umãcore nipe'tirã masã Josuére wiopesase me'rã ã'acãrã niwã. Moisére wee'caronojõta cũ me'rã quẽ'rãrẽ mejãrõta weecārã niwã.

15 Tu'ajanu'cõ, Õ'acũ Josuére a'tiro nicu niwĩ:

16 “Pa'ia, Õ'acũ masã me'rã ‘Tojo weeguti’ ní'quere cuori acarõre cuorãrẽ ti maa Jordãpu nirãrẽ majãtidutiya.”

17 Tere tu'ogu, Josué pa'iare “Majãtia”, nicu niwĩ.

18 Na cũ dutironojõta pa'ia Õ'acũ ya acarõre miimajãcãrã niwã. Nipe'tirã masã, pa'ia ti acarõ me'rã pẽ'ãca be'ro ti maa ne warõpu ní'caronojõta o'maburocaro niwũ tja.

19 Ɖ'mutārī mujīpūrē, diez nūmurī niri nūmurē, Israe curuacjārā Jordāpū ní'cārā majāa, Gilgal wāmetiropū cārīrā wa'acārā niwā. Gilgal, Jericó macā mujīpū mujātiro pe'e nicaro niwā.

20 Gilgapū Josué ūtāpagare docepaga Jordāpū mii'quepagare cūucū niwī.

21 Josué Israe curuacjārārē a'tiro nicū niwī: “Be'ropū mūsā pāṛāmerā nituriarā na pacūsumāre ‘¿A'tepaga de'ro nisī'rīrō weeti?’ nicā,

22 narē wereya: ‘Israe curuacjārā dia Jordārē pē'arā, aco dūcawaanū'cō, bopori ma'apū pē'awā', nisī'rīrō wee'e.

23 Ō'acū marī wioḡū dia Jordārē ma'a bopori ma'a weewī. Téé ūsā pē'ape'tica be'ropū tojo weedu'uwī. Ō'acū marī wioḡū dūporopū Maa sō'arī maarē wee'caronojōta weewī. Ūsā ti maarē pē'ape'tica be'ropū tojo bopori ma'a weewī.

24 Nipe'tirocjārā Ō'acū cū tutuasere masiāto níḡū, tojo nicā mūsā Ō'acū marī wioḡure wiope-sase me'rā wācūnu'cūcā'to níḡū, tojo weewī”, ni wereya, nicū niwī Josué.

5

Gilgapū na niseti'que ni'i

1 A'tiro wee Ō'acū dia Jordārē Israe curu-acjārārē pē'ato níḡū, boposājācā weecū niwī. Tere tū'orā, nipe'tirā amorreo masā wiorā dia Jordā mujīpū sājārō pe'e nirā pūrō ui, ūcūacārā niwā. Tojo nicā, mejārōta cananeo masā wiorā

dia Mediterráneo sumutopu nirã uicãrã niwã. Tojo weerã “Na me'rã a'mewějērõua'a” ni, ne wãcũticãrã niwã.

² Titare Õ'acũ Josuére a'tiro nicu niwĩ: “Mũsã ãtãperi me'rã yejese pjĩrĩrẽ da'reya. Tu'ajanu'cõ, mũsã toduporopu wee'caronojõta weeya tja. Mũsã Israe curuacjãrã umuarẽ õ'rẽcju yapa caserore yejecõ'aña”, nicu niwĩ.

³ Tere tu'ogu, Josué cũ yejecõ'atje pjĩrĩrẽ da'recu niwĩ. Te me'rã Israe curuacjãrã umuarẽ Aralot wãmetiro opa bu'pa nirõpu na õ'rẽcju yapa caserore yejecõ'acu niwĩ.

⁴ Nipe'tirã umua Egiptopu wija'cãrã, surara sãjãrĩ cũ'manojõ cuorã yucu marĩrõpu wẽrĩpe'tia wa'acãrã niwã.

⁵ Na nipe'tirãputa na õ'rẽcju yapa caserore yejecõ'ano'cãrã nicãrã niwã. Egiptopu wija'cãrã pũrĩcã yucu marĩrõpu bajua'cãrã yejecõ'ano'ña marĩcãrã niwã.

⁶ Õ'acũ na ñecũsumuarẽ “Mũsã pãrãmerã nituriarãpũre añuse di'tare o'oguti”, nicu niwĩ. Te di'ta añuse di'ta nujãtu'que, apeye otese pĩ'rĩse di'ta nirõsa'a. Tojo nimicã, umua surara sãjãrĩ cũ'manojõ cuorã Egiptopu wija'cãrã pe'e Õ'acũ dutisere queoro weeticãrã niwã. Na tojo ña'arõ weese bu'iri Õ'acũ “Diacjũta na te di'tare ã'asome”, ni ucũcu niwĩ. Tojo weerã na yucu marĩrõpu cuarenta cũ'marĩ sijabaque'aticãrã niwã. Téé na umua wẽrĩpe'ticãpu topũre si-jadu'ucãrã niwã.

⁷ Na wẽrĩ'cãrã põ'rãrẽ Õ'acũ narẽ põ'rãti, ducayu'cãrãrẽ õ'rẽcju yapa caserore Josué

yejecō'acū niwĩ. Na sijari curare yejecō'ano'ña marĩcārã niwã.

⁸ Na nipe'tirã yejecō'ano'ca be'ro na wi'seriacãpũ te cãmirẽ sisorã, nicã'cārã niwã.

⁹ Be'ro Õ'acũ Josuere a'tiro nicū niwĩ: “Ni'cãcã me'rã Egiptocjãrã dutise doca m̃sã bopoyoro ní'quere wijata'acã wee'e.” Cũ tojo wéeca be'ro niyucã, to Gilgal wãmetisa'a.* A'tiro nicãpũ quẽ'rãrẽ mejãrõta wãmetisa'a.

Õ'acũ masãrẽ Egiptopũ miwija'quere wãcũrĩ bosenũmũ ni'i

¹⁰ Israe curuacjãrã Gilgapũ que'ajácãrã niwã. Nimũ'tãrĩ mujĩpũ p̃a semana be'ro opa pa'tiro nirõ Jericó põtẽorõpũ mujĩpũ sãjãrĩ cura Õ'acũ yũ'rũari bosenũmũrẽ boseba'acãrã niwã.

¹¹ Ape nũmũ pe'e Canaá di'ta cjase cebada ãtẽ'que, tojo nicã pã bũcũase marĩrõ ba'acãrã niwã.

¹² Ti nũmũ me'rã Õ'acũ narẽ manárẽ☆ tocã'rõta bũrucã weetũocũ niwĩ. Ti cũ'marẽ ti di'ta cjasere ba'acãrã niwã majã.

Josué Õ'acũ yarã surara wiogũ me'rã ucũ'que ni'i

¹³ Ni'cã nũmũ Josué Jericó pu'to nígũ, cũ diacjũ ni'cũ masũ di'pĩ ñosẽrĩ pĩ me'rã s̃ioejanũ'cãcã ĩ'acũ niwĩ. Josué cũ tiro wa'a, s̃ẽrĩtiña'cũ niwĩ:

—¿Mũ'u ãsã me'rãcjũ niti? ¿Niwetine?
¿Ûsãrẽ ĩ'atu'tirã me'rãcjũ niti? nicū niwĩ.

¹⁴ Cũ yũ'ticũ niwĩ:

* 5:9 5.9 Hebreo ye me'rã Gilgal nirõ “Tũrũmajãmidija'a”, weronjõ bũsũsa'a. ☆ 5:12 5.12 Ex 16.31

—Ne niwe'e. Yu'u Õ'acũ yarã surara wiogu musã tiropu a'tiapu, nicu niwĩ.

Cũ tojo nicã tu'ogu, Josué ẽjõpeose me'rã nucũcãpu paamu'rĩque'acu niwĩ.

—Wiogu, yu'u, mu'urẽ da'raco'tegu, ¿de'ro weecã hasari? ni sãrĩtiña'cu niwĩ.

¹⁵ Õ'acũ yarã surara wiogu cãrẽ yu'ticu niwĩ:

—Mu'u sapatu tuweeya. Mu'u nu'cũrõ Õ'acũ nirõ ni'i, nicu niwĩ.

Cũ tojo nicã tu'ogu, Josué cũ duti'caronojõta cũ sapatu tuweecũucu niwĩ.

6

Israe curuacjãrã Jericópu na sãjãa'que ni'i

¹ Jericócjãrã Israe curuacjãrãrẽ pũrõ uicãrã niwã. Israe curuacjãrã sãjãrĩ nĩrã, ti macã cjase soperire añurõ bi'ape'ocã'cãrã niwã.* Tojo weerã ti macãrẽ ne ni'cũ sãjãti, ne wijaticãrã niwã.

² Na tojo weemicã, Õ'acũ Josuére a'tiro ni werecu niwĩ: “Yu'u mu'urẽ Jericóre, tocjũ wiogure, tojo nicã tocjãrã surarare wiatojapu.

³ Tojo weerã musã Israe curuacjãrã surara umua wãmotirã a'tiro weerãsa'a. Musã seis numurĩ ti macãrẽ sutuarãsa'a. Ni'cã numurẽ ni'cãrẽtirita sutuaya.

⁴ Ya acaro duporo siete pa'ia u'mutãrãsama. Nanucũ oveja umua na putise capesa'rire cãorãsama. Seis numurĩ pe'tica be'ro ape numu pe'e ti macãrẽ sietetiri sutuarãsa'a majã.

* **6:1 6.1** Titare macãrĩ ùtã me'rã sã'rĩsãa, yee'que tu'ruri nĩcũcaro niwã.

Musã sutuari cura pa'ia oveja umua capesa'rire putirāsama.

⁵ Na uputu puticã tu'orã, musã caricūrõ põtëorõ caricũña. Musã tojo caricũcã, ti macã cjase ùtã tu'ruri se'tedija pe'tia wa'arosa'a. Tojo wa'ari cura musã maata ti macãpu sãjãárãsa'a."

⁶ Tojo wee Josué pa'iare pijio, a'tiro ni werecu niwĩ: "Musã Õ'acũ ya acarore miiwã'cãña. Siete pa'ia ti acaro dũporo oveja umua capesa'ri na putiatje me'rã wa'ayuato", nicu niwĩ.

⁷ Surara pe'ere a'tiro nicu niwĩ: "Wa'aya. Ti macãrẽ be'toanũ'cãña. Surara wãmotirã Õ'acũ ya acaro dũporo wa'amũ'tãto", nicu niwĩ.

⁸ Nipe'tirã Josué duti'caronojõta weecãrã niwã. Tojo weerã siete pa'ia ti acaro dũporo capesa'rire putimũ'tãwã'cãcãrã niwã.

⁹ A'mewějērĩ masã surara pe'e pa'ia dũporo u'mutãcãrã niwã. ãpẽrã surara ti acaro siro pe'e sirutucãrã niwã. Du'ucũro marĩrõ pa'ia oveja capesa'rire putiwã'cãcãrã niwã.

¹⁰ Surara pe'ere Josué "Di'tamarĩrõ wa'aya. Yu'u caricũduticãpu, musã tutuaro põtëorõ caricũrãsa'a", nicu niwĩ.

¹¹ Josué pa'iare ti acaro me'rã macãrẽ ni'cãti sutuabaque'aduticũ niwĩ. Tojo weetojanũ'cõ, na cãrĩ'caroputa daja, na'itõ'o, cãrĩcãrã niwã.

¹² Ape numu ñamiña'cũrõ Josué wã'cã, cũ duti'caronojõta pa'iare, surarare mejãrõta duticũ niwĩ tja. Tojo weerã pa'ia Õ'acũ ya acarore miiwã'cãcãrã niwã.

¹³ Na siete pa'ia ti acaro dũporo sooro marĩrõ wa'a, na putisere putisutucãrã niwã.

A'mewējēřĩ masã surara pe'e na đuporo wa'acãrã niwã. Āpērã surara ti acaro siro pe'e sirutucãrã niwã. Na sũtuari cura pa'ia ne putidu'uticãrã niwã.

14 Tojo weerã nimũ'tãrĩ numũ be'ro cja numũrẽ apaturi ti macãrẽ sũtuancemocãrã niwã. Tojo sũtuatojanũ'cõ, dajacãrã niwã na cãrĩ'caropũre tja. Seis numũrĩ mejãrõta weecãrã niwã.

15 Be'ro ape numũ siete numũrĩ nirĩ numũrẽ, ñamiña'cũrõ wã'cã, na wee'caronojõta ti macã Jericóre sũtuacãrã niwã tja. Ti numũrẽ majã sietetiri sũtuacãrã niwã.

16 Na sũtuatuocã, pa'ia pũrõ puticã tu'ogu, Josué masãrẽ nicũ niwĩ: "Pũrõ caricũña. Ō'acũ marĩrẽ a'ti macãrẽ o'otojami.

17 Ō'acũ cũ duti'caronojõta ti macã nipe'tise to nise me'rã cõ'ano'rõsa'a. Rahab, umũa me'rã a'metãrãwapata'ari masõ, tojo nicã co ya wi'ipũ nirã dia'cũrẽ yũ'rũono'rõsa'a. Cõta marĩ ĩ'adu'tirã o'o'cãrãrẽ nũoco niwõ.

18 Mũsã Ō'acũ cũ cõ'aduti'que to nisere ne miaticã'ña. Mũsã tojo weecãma, mũsã ye bu'iri Ō'acũ Israe curuacjãrãrẽ ña'abutiario wa'acã weebosami.

19 Nipe'tise ti macã cjase uru, plata, bronce, cõme me'rã wee'quea Ō'acũ ye dia'cũ ni'i. Ō'acũ ya wi'i cjase nũrõrõpũ miicũuno'rõsa'a", nicũ niwĩ.

20 Pa'ia capesa'ri me'rã puticãrã niwã. Tojo busucã tu'orã, masã ni'cãrõ me'rã uputu caricũcãrã niwã. Na tojo caricũcã, ti macã ũtã tu'ru, na yee cã'mota'ami'que se'temadija wa'acaro

niwã. Tojo wa'acã ì'arã, surara ti macãrẽ diacjũta omasãjã, miiwapa wa'acãrã niwã.

21 Be'ro ti macãcjãrã umuarẽ, numiarẽ, ma'mapjiare, bucũrãrẽ, na yarã ecarã me'rãta wẽjẽcõ'acã'cãrã niwã. Nipe'tirãrẽ wẽjẽpe'ocãrã niwã.

22 Josué puarã umua todũporo ti macãrẽ ì'adu'ti'cãrãrẽ nicũ niwĩ: “Mũsã umua me'rã a'metãrãwapata'ari masõ ya wi'ipũ wa'a, core, co acawererãrẽ, na ye nipe'tise me'rã miiwĩrõrã wa'aya. Mũsã core “Tojo weerãti’ ní'caronojõta weeya”, nicũ niwĩ.

23 Cũ tojo nisere tũ'o, ì'adu'tiri masã Rahare, co pacũsumuarẽ, co acawererãrẽ miirã wa'acãrã niwã. Narẽ Israe curuacjãrã nirõ yũ'rũropũ cũucãrã niwã.

24 Be'ro narẽ miiwĩrõca be'ro ti macã Jericõre ãjũacõ'acã'cãrã niwã. Plata, uru, bronze, cõme me'rã wee'que pe'ere Õacũ wi'i cjasere nũrõrõpũ cũucãrã niwã.

25 Josué Rahab, co acawererã dia'cũrẽ wẽjẽticũ niwĩ. Cõta Jericõre ì'adu'tiri masã Josué o'ó'cãrãrẽ nũoco niwõ. Co narẽ weetamu'que me'rã yũ'rũwetico niwõ. Tojo weerã Rahab, co acawererã Israe curuacjãrã me'rã nisetidecotima yujupũ.

26 Be'ro Josué “Ne apaturi a'ti macãrẽ weepoticã'to” nígũ, a'tiro nicũ niwĩ: “No'o ni'cũ a'ti macãrẽ weeposĩ'rĩgũnojoõrẽ Õ'acũ cũrẽ ña'arõ wa'acã weegũsami. Cũ ma'ma macã weenũ'cãrĩ cura cũ macũ masã ma'mi wẽrĩgũsami. Ti macã yee'que tũ'rũri cjase

soperire ò'orĩ cura cũ macũ du'sagu pe'e wêrĩgũsami tja", nicu niwĩ.

²⁷ Õ'acũ Josuére weetamunu'cũcu niwĩ. Tojo weerã ti di'tacjãrã cũ añurõ weesetisere masĩpe'tia wa'acãrã niwã.

7

Acã Õ'acũrẽ yu'rũnũ'cã'que ni'i

¹ Israe curuacjãrã wa'teropure ni'cũ Acã wãmetigu Jericó cjasere Õ'acũ cũ miaduti'quere miacũ niwĩ. Cũ Judá ya curuacjũ, Carmi macũ, Zabdi pãrãmi, Zera pãrãmi ni-turiagu nicu niwĩ. Cũ Õ'acũ cõ'aduti'quere mii'que bu'iri nipe'tirã Israe curuacjãrã me'rã Õ'acũ pũrõ uacu niwĩ.

² Josué ni'cãrẽrã surarare ape macã Hai wãmetiri macãpu o'ócũ niwĩ. Ti macã Betel mujĩpũ mujãtiro pe'e, Bet-aven pu'topũ tojacaro niwũ. Narẽ o'ógũ, "Ti macãrẽ, tojo nicã to sumutopure ï'adu'tirã wa'aya", nicu niwĩ. Tojo weerã na ti macãrẽ ï'adu'tirã wa'acãrã niwã.

³ Dajarã, Josuére werecãrã niwã: "Haipure pejetirãcã mũmũ niama. Tojo weerã nipe'tirã surara ti macãcãrã me'rã a'mewẽjẽrã wa'aticã'to. Pũati mil, o i'tiati mil surara ticũrãta wa'acã añurõsa'a. Na me'rã ti macãcãrãrẽ docaque'acã weerãsama. Tojo weegu nipe'tirã surarare o'óticã'ña", nicãrã niwã.

⁴ Tojo weerã i'tiati mil surara dia'cũ a'mewẽjẽrã wa'acãrã niwã. Haicãrã pe'e narẽ docaque'acã weecãrã niwã. Tojo nicã, narẽ ui, du'tiwã'cãcã weecãrã niwã.

⁵ Israe curuacjārārē omasirutu wējēcārā niwā. Treinta y seis surara wējēno'cārā niwā. Macā sājārī sope pə'to, téé di'ta se'te'caro nituoropə narē sirutu wējēcārā niwā. Tojo weerā Israe curuacjārā bəjaweti, ui wācūtutuaticārā niwā.

⁶ Josué, cū bəjawetisere ĩ'ogū, cū sãñase su'tire wejetū'rēcū niwī. Téé na'ique'ari curapə, Ō'acū ya acaro tiropə paamu'rīque'acū niwī. Bəcūrā quē'rā mejārōta weecārā niwā. Tojo nicā na đəpopapəre di'tare őrēpeocārā niwā.

⁷ Tojo wee Josué Ō'acūrē nicū niwī:

—Ō'acū, ¿de'ro weegu mə'u ũsārē dia Jordārē miipē'rōrī? Mə'u amorreo masā ũsārē wējēcō'ato nígū, ¿tojo weerine? Ŭsā ti maa ape pā'rēpə tojacā añuyə'rəabopā.

⁸ Wiogu, Israe curuacjārā surara ũsārē ĩ'atu'tirārē uirā, omamə'tāma. Na tojo weecā ĩ'agū, yə'u ¿de'ro ni werebosari narē?

⁹ Cananeo masā, āpērā a'ti di'tacjārā ũsārē tojo wa'a'quere tə'ope'ticā'rāsama. Ŭsā nipe'tirārē wējērāsama. Ne ni'cū ũsā wa'teropəre toja-some. To pūrīcārē Ō'acū, nipe'tirā a'ti di'tacjārā mə'urē ña'arō wācūrāsama, tojo nicā mə'u wāmerē, nicū niwī Josué Ō'acūrē.

¹⁰ Cū tojo nisere tə'ogu, Ō'acū Josuére yə'ticū niwī:

—Wā'cānə'cāña. ¿De'ro weegu mə'u nucūcāpə paamu'rīque'ati?

¹¹ Israe curuacjārā yə'u dutisere yə'rənə'cāma. Yə'u məsārē “Weeticā'ña” ní'quere queoro weetiama. Yə'u Jericó cjasere, yə'u miidutiti'quere miama. “Ña'a ni'i”, ni

masĩmirã, yajama. Tere miitoja, na ye apeyenojõ wa'teropu nũoama.

12 Tojo weerã Israe curuacjãrã na tojo wee'que wapa narẽ ĩ'atu'tirãrẽ põtẽosome. Narẽ põtẽonu'cã, a'mewẽjẽrõnojo o'orã, mejõ pe'e narẽ uiwã'cãrãsama. Na basu bu'iri da'reno'rãsama. Mũsã yu'u "Miaticã'ña" ní'quere maata cõ'aticãma, ne mũsã me'rã ninemosome majã.

13 Masãrẽ neocũu, narẽ weregũ wa'aya: "Õ'acũ mũsãrẽ a'tiro niami: 'Mũsã Israe curuacjãrã, yu'u mũsãrẽ "Miaticã'ña" ní'que mũsã wa'teropu ni'i. Mũsã tere cõ'ape'oticãma, ne mũsã me'rã a'mewẽjẽrãrẽ docaque'acã weesome. Namiacãrẽ yu'u ĩ'orõpu nu'cũrãsa'a. Tojo weerã yu'u ĩ'orõpu ña'ase marĩrã niato nĩrã, mũsã ye su'tire coe, mũsã ya upũre u'acoecã'ña. Apoyu'cãrãpu nitojaya.

14 Yu'u ĩ'orõpu nipe'tirã mũsã ye curarinucũ bajuyoropu ejanu'cãña. Yu'u beseri cura nipe'tise nisirutuse curarire besewéeno'rõsa'a. Nisiruturi curua yu'u beséca curua ni'cũ põ'rã nise curari besewéeno'rõsa'a. Ni'cũ põ'rã yu'u beséca curua na umuarẽ beseno'rõsa'a.

15 Yu'u "Miaticã'ña" ní'quere cuogu cũ acawererã me'rã, tojo nicã cũ cuose nipe'tise me'rã ãjũacõ'ano'gũsami. Cũ Israe curuacjãrãrẽ bopoyoro wee'que bu'iri, tojo nicã yu'u "A'tiro weeya" ní'quere yu'rũnu'cã'que bu'iri ãjũacõ'ano'gũsami' ", nicu niwĩ Õ'acũ Josuére.

Acãrẽ bu'iri da're'que ni'i

16 Ape nũmũ ñamiña'cũrõ Josué masãrẽ te curarinũcũ wijatiduticũ niwĩ. Tojo weeri curare Ô'acũ Judá ya curuacjãrãrẽ ï'ocũ niwĩ.

17 Be'ro Josué ti curuacjãrãrẽ nisirutuse curarire wijatiduticũ niwĩ. Ô'acũ Zera ya curuare ï'ocũ niwĩ. Ti curua wa'terore Zabdi acawerãrẽ besecũ niwĩ.

18 Zabdi acawererã mũmarẽ ï'obũrocã, Acã wãmetigũ beseno'cũ niwĩ. Acã Carmi macũ, Zabdi pãrãmi, Zera pãrãmi nituriagũ, Judá ya curuacjũ nicũ niwĩ.

19 Tojo weegu Josué cãrẽ nicũ niwĩ:

—Mũ'u yũ'u macũ weronojõ nigũ ni'i. Ô'acũ, Israe curuacjãrã wiogũre e'catipeoya. Mũ'u wee'quere diacjũ wereya, nicũ niwĩ.

20 Acã cãrẽ yũ'ticũ niwĩ:

—Diacjũta mũ'urẽ were'e. Israe curuacjãrã wiogũ Ô'acũrẽ yũ'rũnũ'cãwũ. A'tiro weewũ.

21 Jericó cjase marĩ mii'que wa'teropũ ni'cãrõ su'tiro añubutiaro Babiloniacjãrã wéeca su'tirore ï'awũ. Tojo nicã plata kujiri doscientos kujiri, ni'cãgũ uru me'rã wee'cũre, ni'cã kilo deco nũcũcjũre mũripeja, miicã'wũ. Ya wi'i su'ti caseri me'rã wéeca wi'i po'peapũ yaacã'wũ. Niyeru apeye docapũ ni'i, nicũ niwĩ.

22 Cũ tojo nicã tu'ogũ, Josué ãpẽrãrẽ Acã ya wi'ipũ wa'aduticũ niwĩ. Cũ ya wi'ipũ Acã míca su'tirore, niyerure, urugũre bocacãrã niwã.

23 Tere míi, Josuére, tojo nicã Israe curuacjãrãrẽ wiacãrã niwã. Ô'acũ “Masã me'rã añurõ weeguti” ní'quere cõori acaro põtẽorõpũ cũucãrã niwã.

24 Be'ro Josué, Israe curuacjārã me'rã Acã, Zera macūrẽ, niyeru cū yaja'quere, su'tirote, urure, cū pō'rã umuarẽ, numiarẽ, cū yarã ecarã wecuare, burroare, ovejare, tojo nicã cū ya wi'i su'ti caseri me'rã wéeca wi'ire, nipe'tise cū cuosere na cãrĩrõ yu'rũro Acor wãmetiro pa'tiropũ miacãrã niwã.

25 Josué cūrẽ nicũ niwĩ:

—¿De'ro weegu mũ'ũ marĩrẽ a'te bopoyoro bu'iri da'reatjere weeati? Ni'cãrõacã Õ'acũ mũ'ũrẽ bu'iri da'regũsami, nicũ niwĩ.

Tojo nitoja, nipe'tirã Israe curuacjārã ũtãperi me'rã cūrẽ, cū yarã ecarãrẽ doquewějẽcãrã niwã. Be'ro narẽ ũjũacõ'acãrã niwã.

26 Na bu'ipũ Josué ũtã mesãjo seepeocu niwĩ. Te me'rã Õ'acũ na me'rã ua'que pe'tia wa'acaro niwũ. Tojo weero ti pa'tiro Acor wãmetidecotisa'a yujupũ.

8

Israe curuacjārã Haicjārãrẽ docaque'acã wee'que ni'i

1 Tojo wéeca be'ro Õ'acũ Josuére a'tiro nicũ niwĩ: “Ne uiticã'ña. Wãcũtutuaya. Mũ'ũ yarã surara nipe'tirãrẽ neocũu, Haicjārã me'rã a'mewějẽrã wa'aya tja. Yu'ũ Haicjārã wiogure, tojo nicã ti macãcjãrãrẽ mũsãrẽ wapata'acã weetamugũti. Cũ ya macã, na ya di'ta nimi'caro mũsã ye tojarosa'a.

2 Mũ'ũ Jericócjũ wiogure, ti macãcjãrãrẽ wee'caronojõta Haicjãrãrẽ, na wiogu quẽ'rãrẽ weegusa'a tja. Ni'cãrõacãma na cuose, na yarã

ecarã musã yarã tojarãsama. Musã a'tiro weeya. Macã sê'ema pe'e ni'cã curua mæ'u yarã surarare wa'adutiya", nicu niwĩ.

³ Tojo weegu Josué treinta mil surara añurõ a'mewējēmasĩrãnojõrẽ ñamipure Haipure o'õgu,

⁴ a'tiro nicu niwĩ: "Musã añurõ tu'oya. Macã sê'ema pe'e wa'a, bajutiropu niña. Na me'rã a'mewējējã, tu'omasĩ co'teya.

⁵ ãpērã surara yu'u me'rã bajuyoro pe'e pi'arãsama. Haicjãrã ãsãrẽ ĩ'arã, ãsãrẽ wējērãtirã macãpu ní'cãrã wijatirãsama. Na tojo weecã, ãsã toduporopu wee'caronojõta ui omarãsa'a.

⁶ Na pe'e macãpu wija, ãsãrẽ siruturãsama. 'Toduporo wee'caronojõ marĩrẽ uiwã'cãrã weema', nirãsama.

⁷ Na tojo weecã ĩ'arã, musã macã sê'ema pe'e ní'cãrã macãpu sãjãaña. Sãjãa, ti macãcjãrã nipe'tirãrẽ wējēpe'ocã'ña. Õ'acũ musã wiogu ti macãrẽ musã ya macã tojacã weegusami.

⁸ Be'ro Õ'acũ duti'caronojõta ti macãrẽ ãjũacã'ña. Yu'u musãrẽ dutitoja'a", nicu niwĩ Josué.

⁹ Tojo níca be'ro Josué narẽ Betel, Hai wa'teropu wa'a, tojaduticu niwĩ. Hai mujĩpũ sãjãrõ pe'e tojacaro niwũ. Josué pe'e cũ yarã masã me'rã ti ñamirẽ mejãrõputa yu'rucucu niwĩ.

¹⁰ Ape nãmu ñamiña'cũrõ cũ masãrẽ ĩ'awã'cãcu niwĩ. Be'ro Israe curuacjãrã wiorã me'rã su'ori Haipu a'mewējēgũ wa'acucu niwĩ.

¹¹ Nipe'tirã surara cũ me'rã nirã ti macã

põtëorõpɸ etacãrã niwã. Eta, ti macã yɸ'rɸropɸ tojaque'acãrã niwã. To na nirõ me'rã opa pa'tiro nidijacaro niwã.

¹² Josué ni'cãmocɸsetiri mil surarare Betel, Hai wa'teropɸ mujĩpũ sãjãrõ pe'e nɸocũucɸ niwĩ.

¹³ A'tiro wee surarare pɸa curua dɸcawaacãrã niwã. Ni'cã curua ti macã mujĩpũ sãjãrõ pe'e tojacãrã niwã. Ape curua ti macã yɸ'rɸro pe'e tojacãrã niwã. Ti ñamita Josué opa pa'tiro nidijaro decopɸ tojacɸ niwĩ.

¹⁴ Haicjũ wiogɸ tojo wa'acã ã'agũ, sojaro me'rã cũ yarã surara me'rã ti macãpɸ ní'cãrã wija, dia Jordã cja pa'tiropɸ Israe curuacjãrã me'rã a'mewẽjẽgũ wa'acɸ niwĩ. “Ape curua Israe curuacjãrã ti macã sê'ema pe'e du'tiapã” ni, masiticɸ niwĩ.

¹⁵ Josué, cũ surara me'rã du'tirã weronjõ weesoocãrã niwã. Tojo weerã yucɸ marĩrõ nirĩ ma'a pe'e uiwã'cãcãrã niwã.

¹⁶ Tojo weerã nipe'tirã surara Haicjãrã na wiorã dutisere tɸ'orã, Josuére siraturã, na ya macãrẽ wijawã'cãcãrã niwã.

¹⁷ Nipe'tirã ɸmɸa Haicjãrã, tojo nicã Betecjãrã Israe curuacjãrãrẽ siraturã, wa'ape'tia wa'acãrã niwã. Tojo weero ti macã co'tero marĩrõ tojacaro niwã.

¹⁸ Be'ro Õ'acũ Josuére nicɸ niwĩ: “Mɸ'ɸ ñosẽrĩ pjĩ me'rã ti macãrẽ sĩopuaya. Ti macãrẽ mɸ'ɸ ya macã tojacã weeguti.”

Tojo weegɸ surarare Josué ti pjĩ me'rã sĩopuatjãgũ, “A'mewẽjẽrã wa'aya”, nicɸ niwĩ.

19 Cũ tojo nicãta, surara na bajutiropu ní'cãrã sojaro me'rã wijacãrã niwã. Ti macãpu omasãjã, pecame'e sî'ayoobaque'ocãrã niwã.

20 Haicjãrã surara majãmiñatõrõrã, na ya macãrẽ o'me mɔjãacã ï'acãrã niwã. Israe curuacjãrã uiwã'cãmi'cãrã majãmitojati, na me'rã a'mewějẽrã a'ticãrã niwã. Tojo weero ne aperyopu narẽ du'tita basioticarõ niwã.

21 Josué, nipe'tirã Israe curuacjãrã ti macã sẽ'emapu du'ti'cãrã ti macãrẽ ỹjũacõ'acã ï'arã, majãmitojaa, Haicjãrã me'rã a'mewějẽrã a'ticãrã niwã.

22 Be'ro ti macãrẽ sãjãa'cãrã wijaa, Haicjãrãrẽ cã'mota'aque'acãrã niwã. Tojo weerã na Haicjãrã Israe curuacjãrã pua curua decopu tojacãrã niwã. Israe curuacjãrã na nipe'tirãrẽ wějẽpe'ocã'cãrã niwã.

23 Haicjãrã wiogu dia'cũrẽ wějẽticãrã niwã. Cũrẽ ñe'e, Josué tiropu miacãrã niwã.

24 Israe curuacjãrã na sirutu'cãrãrẽ wějẽpe'oca be'ro na Haipu daja, du'sa'cãrãrẽ wějẽpe'ocã'cãrã niwã tja.

25 Ti numurẽ doce mil masã Haicjãrã umua, numia wẽrĩcãrã niwã.

26 Josué pe'e cũ ñosẽrĩ pjĩrẽ sïopuanu'cũcu niwĩ. Téé na nipe'tirã Haicjãrãrẽ wějẽpe'oca be'ropu du'udijocu niwĩ.

27 Be'ro Õ'acũ Josuére weeduti'caronojõta Israe curuacjãrã ti macã cjase apeyenojõ, tojo nicã na yarã ecarã me'rã tojacãrã niwã.

28 Josué Haire ỹjũacõ'acã, te ỹjũamo'a'que, tojo nicã ti macã cjase ỹtãperiacã dia'cũ tojacaro

niwũ. Ni'cãrõacãpũ quẽ'rãrẽ tojota bajudeco-tisa'a yujupũ.

²⁹ Haicjũ wiogure wẽjẽca be'ro yucugupũ du'teyoocu niwĩ téé ñamica'apũ. Na'ique'ari cura cãrẽ miidijoduti, cã upũre macã sãjãarõpũ cõ'aduticũ niwĩ. Be'ro cã bu'i ãtãperi me'rã seebi'acũuduticũ niwĩ. A'tocaterore ti ãtãmesã cũñasa'a yujupũ.

Josué Ebal ãrũgũ wãmeticjupũ Moisé dutise cũu'quere bu'e'que ni'i

³⁰ Te be'ro Josué ãrũgũ Ebal wãmeticjupũ Israe curuacjãrã wiogu Õ'acũrẽ ãjõpeorãtirã, wa'icũrãrẽ ãjũamorõpeorore ni'cã mesã ãtã me'rã seeneocũucũ niwĩ.

³¹ Cã Moisé, Õ'acũ dutisere weeco'tegu, Israe curuacjãrãrẽ duti'caronojõta da'reduticũ niwĩ. Moisé cã dutise cũuca turi oja'caronojõta ãtãpaga páate, bopeno'ña marisepaga me'rã tojo weecãrã niwã. Tojo weerã topũ Israe curuacjãrã Õ'acũrẽ ãjõpeorã, wa'icũrãrẽ wẽjẽ ãjũamorõpeocãrã niwã.

³² Topũ Israe curuacjãrã ã'orõpũ tepagaputa tja Josué Õ'acũ Moisére dutise cũu'quere ojaõ'ocu niwĩ.

³³ Nipe'tirã masã Israe curuacjãrã, Israe curuacjãrã nitirã na me'rã sjarã, nipe'tirã bucũrã, narẽ sũ'ori nirĩ masã, tojo nicã beseri masã Õ'acũ ya acaro tiro pũaperi nũ'cãejacãrã niwã. Pa'ia Leví ya curuacjãrã ti acarore wũawã'cãrã masã pãjãrã diacjũ pe'e ejanũ'cãcãrã niwã. Õ'acũ narẽ “Añurõ wa'ato” nisere tũ'orãtirã, ãrũgũ Gerizim wãmeticjũ du'pocãpũ deco me'rã

masã nu'cãejacãrã niwã. Āpẽrã pe'e ũrũgũ Ebal wãmeticju du'pocãpũ nu'cãejacãrã niwã. Moisé ne waro dutinũ'cã'caronojõta weecãrã niwã.

³⁴ Be'ro Josué nipe'tise Moisé cũ duti'quenucũ bu'eñocu niwĩ. “Añurõ wa'arosa'a” ní'quere, tojo nicã “Ña'arõ wa'arosa'a” ní'quere bu'ecu niwĩ.

³⁵ Ne ni'cã uuro Moisé duti'quere Josué bu'eticã weeticu niwĩ. Nipe'tirã Israe curuacjãrã topũ nerẽrãrẽ bu'eñope'ocã'cu niwĩ. Du'aro marĩrõ numiarẽ, wĩ'marãrẽ, tojo nicã Israe curuacjãrã nitirã na me'rã nirã quẽ'rãrẽ bu'ecu niwĩ.

9

Gabaõcjãrã Israe curuacjãrãrẽ nisoo'que ni'i

¹ Nipe'tirã wiorã dia Jordã mujĩpũ sãjãrõpũ nirã Israe curuacjãrã na a'mewẽjẽ, wapata'a'quere tu'ocãrã niwã. Na hitita masã, amorreo masã, cananeo masã, ferezeo masã, heveo masã, tojo nicã jebuseo masã nicãrã niwã. Ĕrũpagupũ nirã, opa bu'pa nirõpũ nirã, maa pajiri maa Mediterráneo sumutopũ nirã téé Líbanopũ nirã nicãrã niwã.

² Tojo weerã na Josué, Israe curuacjãrã me'rã a'mewẽjẽrã a'tirã, ni'cãrõ me'rã nerẽcãrã niwã.

³ Tojo weemicã, heveo masã Gabaõpũ nirã pe'e, Josué Jericó, tojo nicã Haipũ wee'quere masicãrã niwã.

⁴ Tojo weerã Israe curuacjãrãrẽ a'tiro weesoocãrã niwã. Ma'apũ wa'arã, na burro bu'ipũ ajuri mejã, tojo nicã vino poseye'que

ajuri mejãmejã, tũ'rũ'que mejã, sereõ'o'quere miacãrã niwã.

⁵ Tojo nicã su'ti mejã, sapatu caseri tũ'rũ'que, sereõ'o'quere sãñacãrã niwã. Ma'apũ wa'arã, pã boposã'que, butiwija'quere miacãrã niwã.

⁶ Na Josué nirõ Gilgapũ ejarã, cũrẽ, tojo nicã Israe curuacjãrãrẽ a'tiro nicãrã niwã:

—Yoarocjãrãpũ a'ti'i. Tojo weerã musã ãsã me'rã “A'tiro weerãti”, ni apoya, nicãrã niwã.

⁷ Israe curuacjãrã heveo masãrẽ yu'ticãrã niwã:

—Apetero weerã musã ãsã pu'toacãcjãrã nisa'a. Tojo nicãma, musã me'rã “A'tiro weerãti”, nĩmasĩtisa'a.

⁸ Na pe'e Josuére nicãrã niwã:

—Ësã musãrẽ da'raco'terã nirãsa'a.

Josué pe'e narẽ sãrĩtiña'cũ niwĩ:

—¿Noanojõ niti musã? ¿No'ocjãrãpũ a'tiati? nicũ niwĩ.

⁹ —Ësã yoarocjãrãpũ a'ti'i. Ësã musã wiogũ Õ'acũ tutuasere tu'oapũ. Nipe'tise cũ Egiptopũ wee'quere,

¹⁰ tojo nicã pũarã amorreo masã wiorãrẽ maa Jordã si pã'rẽ pe'e ní'cãrãrẽ cũ wee'quere tu'oapũ. Na Sehón, Hesbón wiogũ, tojo nicã Og, Basán wiogũ nicãrã niwã. Og Astaropũ macãticũ niwĩ.

¹¹ Tojo weerã ãsã wiorã, ãsã ya di'tacjãrã ãsãrẽ a'topũ a'tidutiama. “Musã ma'apũ ba'atjere mia, Israe curuacjãrã tiropũ wa'aya”, ni o'oáma. “Musãrẽ da'raco'terã nirãsa'a. Tojo weerã ‘A'tiro weerãti’ ni apoya”, ni dutio'oáma ãsãrẽ.

12 Ûsã musã tiropu a'ticã, a'te pã asibususep-aga niwũ. Ni'cãrõacãma boposãa'que, buti-wija'que mejã ni'i majã.

13 Tojo nicã a'te vino poseye'que ajuri ma'ma ajuri níni'wũ yujupu. Ni'cãrõacãma tũ'rũ'que ni'i. Ma'a yoaro me'rã tojo wa'awu ùsã ye su'ti, sapatu caseri quẽ'rã, nicãrã niwã.

14 Tere tu'orã, Israe curuacjãrã, Õ'acũrẽ sãrĩtiña'timirã, Gabaõcjãrã pã na cõsere ba'aña'cãrã niwã.

15 Tojo weegu Josué narẽ “Musãrẽ co'te, wẽjẽsome”, ni apocu niwĩ. Æpẽrã Israe curuacjãrã wiorã “Õ'acũ wãme me'rã tojota weerãti”, nicãrã niwã.

16 I'tia numu na apõca be'ro Israe curuacjãrã “Ã'rã marĩ tiropu eta'cãrã marĩ nirõ pu'tocjãrã niapãrã” nisere masĩcãrã niwã.

17 Tojo weerã na Gabaõcjãrã masãrẽ a'marã wa'acãrã niwã. I'tia numu be'ro na ye macãrĩpũre ejacãrã niwã. Te macãrĩ Gabaõ, Cafira, Beerot, tojo nicã Quiriat-jearim nicaro niwũ.

18 Te macãrĩ pu'topu nimirã, tocjãrãrẽ wẽjẽticãrã niwã. Na wiorã Õ'acũ, Israe curuacjãrã wiogu wãme me'rã “Narẽ wẽjẽsome” ni apo'cãrã niyurã, narẽ wẽjẽmasĩticãrã niwã.

Tojo weerã masã na wiorãrẽ ña'arõ ucũco'tecãrã niwã.

19 Wiorã pe'e narẽ yu'ticãrã niwã:

—Ûsã Õ'acũ, Israe curuacjãrã wiogu wãme me'rã, “Narẽ wẽjẽsome”, ni apotojapu.

Tojo weerã ni'cãrõacãma narẽ ne mejẽcã weemasĩtisa'a.

²⁰ Na catinu'cũrãsama. Marĩ Õ'acũ me'rã “Tojo weerãti” ní'quere weeticãma, Õ'acũ marĩ me'rã uagũsami, nicãrã niwã.

²¹ Tojo weerã wiorã narẽ wẽjẽdutiticãrã niwã. Mejõ Israe curuacjãrãrẽ peca paawa'aco'terã, tojo nicã aco waaco'terã nicãrã niwã majã. A'te me'rã na “A'tiro weerãti” ní'quere queoro weecãrã niwã.

²² Be'ro Josué Gabaõcjãrãrẽ pijio, narẽ sãrĩtiña'cu niwĩ:

—¿De'ro weerã mũsã ãsã pũ'to nimirã, yoaropũ a'tiapũ, nisooati?

²³ A'te me'rã mũsã Õ'acũ ña'arõ wa'arosa'a ní'que wapa tojarãsa'a. Tojo weerã mũsã Õ'acũ wi'i cjasenojõrẽ peca paawa'aco'terã, aco waaco'terã ninu'cũrãsa'a.

²⁴ Gabaõcjãrã Josuére yũ'ticãrã niwã:

—Õ'acũ mũ'ũ wiogũ Moisére “A'ti di'tare o'ogũti, tojo nicã a'to nirãrẽ cõ'agũti” ní'quere tũ'owũ. Tojo weerã “Na marĩrẽ wẽjẽbosama” ni uirã, tojo weearũ.

²⁵ Õsã mũ'ũ yarã ni'i. Mũ'ũ no'o ãsãrẽ weesĩ'rĩrõnojõ weeya, nicãrã niwã.

²⁶ Tojo weegũ Josué Israe curuacjãrãrẽ “Ã'rã Gabaõcjãrãrẽ wẽjẽticã'ña”, nicũ niwĩ.

²⁷ Tojo nimigũ, ti nũmũta Gabaõcjãrãrẽ Israe curuacjãrãrẽ peca paawa'aco'terã, aco waaco'terã tojacã weecũ niwĩ. Tojo nicã, Õ'acũ wi'i na ñubuepeoro cjasere Õ'acũ cũ beseno'atjopũ quẽ'rãrẽ tojota weeduticũ

niwĩ. A'tocateropũre Gabaõ masã te da'rasere cãodecotisama yujupũ.

10

Israe curuacjãrã amorreo masãrẽ docaque'acã wee'que ni'i

¹ Wiogũ Jerusalẽcjũ Adonisedec wãmetigu Israe curuacjãrã Haicjãrãrẽ docaque'acã wee'quere tũ'ocũ niwĩ. Cũ “Jericóre, ti macã wiogũre wee'caronojõta Haicjãrãrẽ, na wiogũre weearũ” nisere tũ'ocũ niwĩ. Tojo nicã Gabaõcjãrã Israe curuacjãrã me'rã na ucũ a'merĩ apo'quere tũ'ocũ niwĩ.

² Tere tũ'ogũ, pũrõ uicũ niwĩ. Gabaõ, wiorã nirĩ macã, Hai nemorõ pajiri macã nicaro niwũ. Na Gabaõcjãrã umãa a'mewẽjõtutuarã nicãrã niwã.

³ Tojo weegũ Adonisedec ba'paritise macãrĩcjãrã wiorãrẽ queti o'ócũ niwĩ. Na Hoham Hebrõcjũ, Piream Jarmucjũ, Jafia Laquicjũ, tojo nicã Debir Eglõcjũ nicãrã niwã.

⁴ Narẽ a'tiro nio'ocũ niwĩ: “Gabaõcjãrã Josué, tojo nicã Israe curuacjãrã me'rã apocãrã niama. Tojo weerã musã, musã yarã surara me'rã yũ'ure Gabaõcjãrã me'rã a'mewẽjẽcã weetamurã a'tia”, nicũ niwĩ.

⁵ Tojo weerã na ni'cãmocũrã amorreo masã wiorã nerẽ, na yarã surara me'rã Gabaõcjãrã me'rã a'mewẽjẽrã wa'acãrã niwã. Na wiorã Jerusalẽcjũ, Hebrõcjũ, Jarmucjũ, Laquicjũ, tojo nicã Eglõcjũ nicãrã niwã.

6 Na tojo weecã ï'arã, Gabaõcjãrã Josué Gilgapu nigũrẽ queti o'ócãrã niwã: “Ûsãrẽ, musãrẽ da'raco'terãrẽ cõ'awã'cãticã'ña. Quero, ãsãrẽ weetamurã a'tia. Ûsãrẽ yu'ruorã a'tia. Nipe'tirã wiorã amorreo masã ãrũpagucjãrã ãsã me'rã a'mewẽjẽrãtirã nerẽcãrã niama”, ni queti o'ócãrã niwã.

7 Tere tu'ogu, Josué nipe'tirã cã yarã surara tutuarã me'rã Gilgapu wijaa, Gabaõpu wa'acãrã niwã.

8 Ô'acũ cãrẽ a'tiro nicu niwĩ: “Narẽ uiticã'ña. Yu'u musãrẽ a'mewẽjẽbosa, wapata'acã weeguti. Ne ni'cũ na me'rã nigũ mu'urẽ põtẽomasĩtisami”, nicu niwĩ.

9 Ñamipu Josué Gilgapu wija, wa'abo'rea, amorreo masã ne masĩtiri cura na me'rã a'mewẽjẽnu'cãcu niwĩ.

10 Ô'acũ Israe curuacjãrãrẽ narẽ ucucã weecu niwĩ. Tojo weegu Josué Gabaõpũre pãjãrã amorreo masãrẽ wẽjẽcu niwĩ. Narẽ Bet-horón wãmetiri ma'apu sirutu, téé yoaro apeye macãrĩpu Azeca, Maceda wãmetise macãrĩpu wẽjẽsirutuwã'cãcu niwĩ.

11 Apeyema tja na Bet-horón bu'ari ma'apu uiwã'cãrĩ cura Ô'acũ a'tiro weecu niwĩ. Acoro pejaro weronojõ narẽ yusuase aco peri bu'a'que peri paca burucã weecu niwĩ. Cũ tojo wee'que me'rã pãjãrã amorreo masã wẽrĩcãrã niwã. Israe curuacjãrã surara narẽ wẽjẽ'caro nemorõ pãjãrã wẽrĩcãrã niwã.

12 Ô'acũ Israe curuacjãrã amorreo masãrẽ docaque'acã wéeca numurẽ Josué Ô'acũrẽ masã ï'orõpu nicu niwĩ:

“Mujĩpũ, Gabaõ bu'ipũ tojanũ'cãña.

Mujĩpũ ñamicjũ pe'e, Ajalón cja pa'tiro bu'ipũ tojanũ'cãña”.

13 Cũ tojo nicã, mujĩpũ ʉmʉcocjũ, ñamicjũ téé narẽ ĩ'atu'tirãrẽ wějẽcõ'áca be'ropũ tojanũ'cãtʉocãrã niwã.

A'tere Justo wãmetiri turipũ ojano'wã. Tojo weegũ mujĩpũ ʉmʉcocjũ ʉ'mʉse decopũ tojanũ'cãcũ niwĩ. Ni'cã nũmũ ejatuaro ne sãjãticũ niwĩ.

14 Todʉporopũ ti nũmũ weronojõ Õ'acũ masũrẽ cũ tojo sẽrĩsere yũ'tíca nũmũ weronojõ wa'aticaro niwã. Be'ropũ quẽ'rãrẽ tojo wa'aticaro niwã. Ti nũmũrẽta Õ'acũ cũ tutuaro me'rã Israe curuacjãrãrẽ a'mewějẽtamucũ niwĩ.

15 Be'ro Josué na cãrĩrõ Gilgapũ nipe'tirã Israe curuacjãrã me'rã dajatojaacũ niwĩ.

16 Na ni'cãmocũse macãrĩcjãrã wiorã, ʉtã tutipũ Maceda nirĩ tutipũ du'ticãrã niwã.

17 Be'ro ãpẽrã na ni'cãmocũrã wiorã Macedapũ nirĩ tutipũ du'ti'cãrãrẽ boca, Josuére werecãrã niwã.

18 Josué tere tũ'ogũ, a'tiro dutío'ocũ niwĩ: “Ti tuti sãjãrĩ sopere ʉtãpaga paca me'rã tũrũwã'cã, tuubi'aya. Tojo nicã, ti tutire masãrẽ co'tedutiya.

19 Mũsã pe'e a'tore ne tojatícã'ña. Mũsãrẽ ĩ'atu'tirãrẽ sirutuya. Narẽ na ya macãpũ dajacã weeticã'ña. Õ'acũ marĩ wiogũ narẽ docaque'acã weetojami”, nicũ niwĩ.

20 Tojo weerã Josué, Israe curuacjãrã pãjãrã amorreo masãrẽ wějẽcãrã niwã. Pejetirã na wějẽdũ'a'cãrã na ye macãrĩpũ dajacãrã niwã.

21 Nipe'tirã Israe curuacjãrã surara pe'e narẽ sirutu'cãrã Josué cũ nirõ Macedapũ cãmi marĩrã dajape'ticãrã niwã. Topũ nise macãrĩcjãrã ne cã'rõacã Israe curuacjãrãrẽ ña'arõ ucũticãrã niwã.

22 Be'ro Josué a'tiro nicũ niwĩ: “Ëtã tuti ne sãjãarõpũ pão weetjãrã, na ni'cãmocurã wiorãrẽ miiwĩrõ, yu'u tiropũ miitia”, nicũ niwĩ.

23 Tojo weerã ni'cãmocurã wiorã Jerusalëcjũ, Hebrõcjũ, Jarmucjũ, Laquicjũ, tojo nicã Eglõcjũrẽ miiwĩrõcãrã niwã.

24 Na wiorãrẽ Josué tiropũ miiejãca be'ro nipe'tirã Israe curuacjãrã umuarẽ pijiocũ niwĩ. Surara wiorã cũ me'rã a'mewëjëtamu'cãrãrẽ a'tiro duticũ niwĩ: “Mũsã ã'rã wiorã wãmũtare u'tacũurã a'tia.” Cũ tojo nicã tũ'orã, cũ dutironojõta weecãrã niwã.

25 Be'ro Josué surara wiorãrẽ nicũ niwĩ: “Wãcũtutuaya. Uiro marĩrõ nisetiya. Mũsã narẽ wee'caronjõta Õ'acũ weegũsami nipe'tirã mũsãrẽ ï'atu'tirãrẽ”, nicũ niwĩ.

26 Cũ tojo nitoja, wiorãrẽ wëjëcũ nimi. Be'ro cũ yarã surarare na upũre yucũpagũ ni'cãmocũsepagũpũ du'teyooduticũ niwĩ. Topũ yosana'itõ'ocãrã niwã.

27 Be'ro na'ique'ari cura narẽ miidijoduti, na du'tica tutipũ cõ'aduticũ niwĩ. Ti tuti sãjãrõrẽ ãtã pacasepaga me'rã bi'acãrã niwã. Tepaga topũ nidecoti'ï yujupũ.

Apeye macãrĩcjãrãrẽ Josué a'mewëjëgũ, cũ docaque'acã wee'que ni'ï

28 Narē wějěca nūmūrēta Josué Maceda wiogu, nipe'tirā ti macāpū nirārē wějēpe'ocā'cu niwī. Ne ni'cū tocjūrē caticā weeticū niwī. Cū Jericócjū wiogure wee'caronojōta Maceda wiogu quē'rārē weecu niwī.

29 Maceda macāpū ní'cārā Josué, tojo nicā nipe'tirā Israe curuacjārā Libna wāmetiri macāpū wa'acārā niwā. Topū wa'a, a'mewējērā wa'acārā niwā.

30 Ō'acū Israe curuacjārārē ti macācjū wiogure, cū yarā masārē na dutise doca cūucū niwī. Tocjārā nipe'tirā masārē Josué, cū yarā surara me'rā wějēcō'ape'ocā'cu niwī. Ne ni'cū yū'rūwetiticū niwī. Libna macācjū wiogu Jericócjū wiogure wa'a'caronojōta wa'acaro niwī.

40 Tojo weetjīagū, Josué nipe'tiro ti di'tare ñe'epe'ocā'cu niwī. Tere ñe'egū, ũrūpagū peje, Neguev yucū marībocureropū, tojo nicā opa pa'tirojo nirō, opa bu'pa nirōpū ñe'ecu niwī. Topū nirā nipe'tirā wiorārē docaque'acā weecu niwī. Ne ni'cū wiogu catigu tojatícū niwī. Nipe'tirā masā wějēno'cārā niwā. A'tere Ō'acū, Israe curuacjārā wiogu, cū weeduti'caronojōta weecu niwī.

41 Titare Josué nipe'tirārē nipe'tiropū docaque'acā weecu niwī. Cades-barnea wāmetiro me'rā nū'cā, téé Gazapū yapaticū niwī. Apero quē'rārē Gosén wāmetiro me'rā nū'cā, téé Gabaōpū yapaticū niwī.

42 Ō'acū Israe curuacjārā wiogu cū yarā masārē ma'ígū, a'mewējēbosacū niwī. Tojo

weeyucã, Josué cū a'mewējēse me'rāta na nipe'tirã wiorã pājārārē, tojo nicã te di'tare miwupacã weecu niwĩ.

⁴³ Be'ro Josué cū yarã surara me'rã Gilgal na ní'caropu dajatojaacu niwĩ.

11

Josué Hasocjũ wioġu Jabĩrē, āpērã wiorã cū me'rãcjārārē docaque'acã wee'que ni'i

¹ “Tojo wa'aporo” nise quetire tu'ogu, Jabín Hasor macã wioġu a'tiro weecu niwĩ. Jobab wāmetiġu Madón macã wioġure, tojo nicã Simrón, Acsaf macãrĩcjārã wiorārē pijiocu niwĩ.

² Apeyema wiorã ũrũpagu nortepu nirārē pijiocu niwĩ. Tojo nicã, ditara Cineret* siropu nirārē pijiocu niwĩ. Āpērãma opa pa'tiro nídijaro nirã Dor mujĩpũ sãjãrõcjārārē pijiocu niwĩ.

³ Āpērã mujĩpũ mujãtiro pe'ecjārã cananeo masārē, mujĩpũ sãjãrõ pe'ecjārã cananeo masārē, amorreo masārē, hitita masārē, ferezeo masārē, jebuseo ũrũpagupu nirĩ masārē, heveo masã ũrũġũ Hermón wāmeticju nídijaro Mizrapu nirārē pijiocu niwĩ.

⁴ Tojo weerã na wiorã na yarã surara me'rã a'mewējērã wa'acãrã niwã. Na yarã cabayua pājārārē, na a'mewējēse cabayua wejese pawu me'rã wa'acãrã niwã. Na pājārã waro nitjãrã, nucũpori maa sumuto cjase weronojõ nicãrã niwã.

* **11:2 11.2** Apetero ditara Cineret “Galilea” pisuno'caro niwã.

⁵ Be'ro na Israe curuacjārã me'rã a'mewējērã wa'arãtirã, “A'tiro weerã” ni, a'merĩ apocãrã niwã. Tu'ajanu'cõ, ni'cã curuajota aco nirõ Merom tiropu que'aejacãrã niwã.

⁶ Na tojo weecã ï'agũ, Õ'acũ pe'e Josuére “Narẽ ne uiticã'ña. Ñamiacã a'ti orata na pãjãrãrẽ musã wējẽpe'ocã weeguti. Musã pe'e na yarã cabayua du'pocãrĩ u'tacũuse wadarire dutesureapa. Tojo nicã na tũrũsepawu a'mewējẽsepawu cabayua na wejesere ũjũapa”, nicu niwĩ.

⁷ Tojo wee Josué, cũ yarã surara me'rã wa'a weetjãgũ, narẽ ï'atu'tirã masĩno'ña marĩrõ, aco nirõ Merõpu na me'rã a'mewējẽnu'cãcu niwĩ.

⁸ Õacũ pe'e Israe curuacjãrãrẽ narẽ miiwapa wa'acã weecu niwĩ. Na narẽ téé Sidõ macãjopu, tojo nicã Misrefot-maim, apero opa pa'tiro Mizpa mujĩpũ mujãtiropu narẽ sirututuocãrã niwã. Ne ni'cũ catiticu niwĩ.

⁹ Õ'acũ cũ duti'caronojõta Josué queoro weecu niwĩ. Tere wéégũ, cũrẽ ï'atu'tirã yarã cabayuare na du'pocãrĩ u'tacũuse wadarire duteçu niwĩ. Tojo nicã na tũrũsepawu a'mewējẽsepawure ũjũacu niwĩ.

¹⁰ A'mewējẽgũ eta'cu cũ dajãca be'ro Josué Hasor macãrẽ miiwapacu niwĩ. Titare cũ ya di'pjĩjo me'rã ti macãcjũ wiogure wējẽcu niwĩ. Ti macã Hasota apeye macãrĩ nemorõ nirĩ macã nicaro niwũ.

¹¹ Israe curuacjãrã nipe'tirã ti macãpu nirãrẽ wējẽpe'ocãrã niwã. Ti macã Hasore matõdijope'o, ũjũacõ'acãrã niwã.

12 Josué topu nise macãrĩ nipe'tise macãrĩrẽ na wiorã me'rãputa miiwapacu niwĩ. Wiorãrẽ di'pjijo me'rã wējẽcõ'ape'ocũ niwĩ. Nipe'tirãrẽ, nipe'tisere mutõdijope'ocũ niwĩ. Cũ tojo weese me'rã Josué Moisé, Ô'acũ dutisere weeco'tegu, cũ duti'quere queoro weeme'rĩcã'cũ niwĩ.

13 Israe curuacjãrã opa bu'papu nise macãrĩma ãjũaticãrã niwã. Hasor dia'cũrẽ ãjũacãrã niwã.

14 Te macãrĩpu nirãrẽ di'pjijo me'rã wējẽcõ'acãrã niwã. Ne ni'cũ catigu tojatĩcu niwĩ. Te macãrĩ cjase, na yarã ecarã, na ye apeyenojõ nimi'que Israe curuacjãrãrẽ tojacarõ niwã.

15 Ô'acũ Moisére duti'caronojõta Moisé pe'e quẽ'rã Josuére dutituriacu niwĩ. ã'rĩ Josué pũrĩcã Ô'acũ cũ Moisére duti'que weeturiagu, te cũ dutise cũu'quere ne cã'rõ we'otĩcu niwĩ. Nipe'tisere añurõpu weedutipe'ocũ niwĩ.

16 Josué a'ticuse di'tare miiwapacu niwĩ. Nipe'tiro ãrũpagu nirõrẽ miiwapacu niwĩ. Nipe'tiro Neguere, tojo nicã nipe'tiro Gosẽrẽ, nipe'tiro opa pa'tiro nirõrẽ, nipe'tiro Arabãre, tojo nicã Israe nipe'tiro ãrũpagu tiropu to opa pa'tiro nirõrẽ ñe'epe'ocũ niwĩ.

23 Todapoporpu Ô'acũ Moisére duti'caronojõta Josué nipe'tiro Canaã di'tapu peje macãrĩrẽ miiwapacu niwĩ. Tu'ajanu'cõ, Josué ti di'tare Israe curaricjãrãrẽ ducawaacu niwĩ. Nanucũ na ye di'ta tojato nígu, tojo weecu niwĩ. Be'ro ti di'tapure ne a'mewẽjẽse marĩcarõ niwã majã.

12

Moisé dia Jordã mujĩpũ mujãtiro pe'ecjãrã wiorãrẽ docaque'acã wee'que ni'i

¹ Moisé catícatero Israe curuacjãrã puarã wiorã dia Jordã mujĩpũ mujãtiro pe'ecjãrãrẽ docaque'acã weetojacãrã niwã. Na ye di'ta nimi'quere miiwapacãrã niwã. Te di'ta dia Arnón wãmetiri maa me'rã nũ'cã, tojo nicã nipe'tiro dia Jordã sumuto nirĩ pa'tiro, téé ũrũgũ Hermón wãmeticjũpũ nituocaró niwũ.

² Ni'cã wiogũ Sehón amorreo masã wiogũ nicũ niwĩ. Cũ Heshbón wãmetiri macãpũ niseticũ niwĩ. Cũ dutiro Aroer wãmetiri macã me'rã nũ'cã, téé dia Arnón sumuto nicaro niwũ. Tojo nicã, ti pa'tiro deco me'rã nũ'cã, dia Jaboc me'rãpũ nituocaró niwũ. Dia Jaboc ape di'ta amonita masã ya di'ta sãjãrõpũ nicaro niwũ. Tojo nicã Galaad di'ta deconojõ cũ dutiri di'ta nicaro niwũ.

³ Apeyema tja mujĩpũ mujãtiro dia Jordã pa'tirote duticũ niwĩ. Cineret* wãmetiri ditara me'rã dutinũ'cã, téé o'maburotiri ditara me'rãpũ duti yapatituocũ niwĩ. Toó Bet-jesimot mujĩpũ sãjãrõ pe'e toja, sur pe'e téé Pisga wãmeticjũ ũrũgũ du'pocãpũ dutituocũ niwĩ.

⁴ Apĩ pe'e Og wãmetigũ Basán wãmetiro dutigũ nicũ niwĩ. Cũ refaíta masã† pejetirã du'sagu me'rãcjũ nino'gũ nicũ niwĩ. Cũ Astarot, tojo nicã Edrei wãmetise macãrĩpũ niseticũ niwĩ.

* **12:3 12.3** Ñaña Jos 11.2 docapũ oja'quere. † **12:4 12.4** Refaíta masã ni'cã curua masã pacarã waro nicãrã niwã.

⁵ Og téé nor tepu Hermón wāmeticju ūrūgūpu dutitucū niwī. Cū Salca macārē, nipe'tiro Basán wāmeti rore duticū niwī. Téé ape di'ta na ta'a'caro Gesur wāmeti rore, tojo nicā Maaca wāmeti rore, apero Galaad di'ta decopu Sehón, Hesbón macā wiogu cū dutiropure dutitucū niwī.

⁶ Moisé, tojo nicā Israe curuacjārā ā'rā wiorā puarārē a'mewējē docaque'acā weecārā niwā. Be'ro Moisé te di'tare Rubén ya curuacjārārē, Gad ya curuacjārārē, tojo nicā Manasés ya curuacjārā deco me'rā nirārē na ye niatje di'tare ducawaacu niwī.

Josué dia Jordā mujīpū sājārō pe'ecjārā wiorārē docaque'acā wee'que ni'i

⁷ A'ticūrā wiorārē Josué Israe curuacjārā me'rā dia Jordā mujīpū sājārō pe'ecjārā, to Baal-gad Líbano wāmetiri pa'tiropu Halac wāmeticju ūrūgūpu, tigu Seipu u'muatu'ajanu'cōsa'a. Josué ā'rā wiorā ye di'ta nimi'quere a'mewējē, wapata'a, Israe curuacjārārē te curarinucūrē te di'tare ducawaacu niwī. Te di'ta na ye waro tojanu'cūcā'caro niwū.

⁸ Ūrūpagu pijaro pe'e, opapa nirō pe'ema, tojo nicā Jordā pa'tiro pe'ema, opa tū'rari nídijase co'ari, yucu marīrō, masā marīrō Neguev cjase ā'rā masā ye di'ta nicaro nimiwū: Hitita masā, amorreo masā, cananeo masā, ferezeo masā, heveo masā, tojo nicā jebuseo masā ye di'ta nicaro nimiwū.

⁹ Wiorā a'mewējērā docaque'a'cārā a'ticūrā nicārā niwā: Jericó wiogu, apī Hai, Betel macā pu'to wiogu,

- 10 apĩ Jerusalé wiogu, apĩ Hebrõ wiogu,
 11 apĩ Jarmut wiogu, apĩ Laquis wiogu,
 12 apĩ Eglón wiogu, apĩ Gezer wiogu,
 13 apĩ Debir wiogu, apĩ Geder wiogu,
 14 apĩ Horma wiogu, apĩ Arad wiogu,
 15 apĩ Libna wiogu, apĩ Adulam wiogu,
 16 apĩ Maceda wiogu, apĩ Betel wiogu,
 17 apĩ Tapúa wiogu, apĩ Hefer wiogu,
 18 apĩ Afec wiogu, apĩ Sarón wiogu,
 19 apĩ Madón wiogu, apĩ Hazor wiogu,
 20 apĩ Simron-merón wiogu, apĩ Acsaf wiogu,
 21 apĩ Taanac wiogu, apĩ Meguido wiogu,
 22 apĩ Cedese wiogu, apĩ Joceneam wiogu, ũrũgũ
 Carmelo dũ'pocãpũ nigũ,
 23 apĩ Dor wiogu, Dor majãrõcjũ, apĩ Goim
 wiogu, Gilgal wãmetiri macãcjũ,
 24 apĩ Tirsa wiogu nicãrã niwã. Na wiorã
 nipe'tirã nĩrã treinta y uno nicãrã niwã.

13

*Josué Canaá di'tare Israe doce curaricjãrãrẽ
dũcawaa'que ni'i*

1 Josué bũcũ waro êjãcã, Õ'acũ cãrẽ a'tiro nicũ
niwĩ: “Mũ'ũ bũcũ waro ni'i. A'ti di'tare mũsã
ñe'eatje peje dũ'sa'a yujupũ.

6 Israe curuacjãrã na ã'orõpũta sidonio
masãrẽ cõ'awĩrõgũti. Tojo nicã, nipe'tirã masã
to ũrũgũpũ nirãrẽ Líbano me'rã nu'cã, téé
Misrefot-maipũ cõ'awĩrõgũti. Mũ'ũ pe'e te di'ta
na wa'awe'o'quere Israe curuacjãrãrẽ miiwapa,
dũcawaaya. Yũ'ũ mũ'ũrẽ duti'caronojõta weeya.

7 Tojo weegu nueve curari, tojo nicã Manasés ya curuacjārã deco me'rã nirārẽ nipe'tise di'tare ducawaawe'oya", nicu niwĩ Õ'acũ.

Josué Jordã mujĩpũ mujãtiro pe'ecjãrãrẽ di'ta ducawaa'que ni'i

8 Moisé Rubén ya curuacjãrãrẽ, Gad ya curuacjãrãrẽ, tojo nicã Manasés ya curuacjãrã deco me'rã nirārẽ na niatji di'tare o'otojacu niwĩ. Te di'ta dia Jordã mujĩpũ mujãtiro pe'e nicaro niwũ.

14 Moisé Leví ya curuacjãrã pe'ema di'tare o'oticu niwĩ. Mejõ Õ'acũ Moisére ní'caronojõta "Leví ya curuacjãrã ye niatje masã yu'ure ñubuepeorã, wa'icãrãrẽ wẽjẽ ñjũamorõpeose cjase nirõsa'a", nicu niwĩ.

14

Josué dia Jordã mujĩpũ sãjãrõ pe'e cjase di'tare ducawaa'que ni'i

1 Te di'tata Canaá di'ta cjase nicaro niwũ. Pa'i Eleazar, Josué, Nun macũ, tojo nicã nipe'tise curaricjãrã wiorã te di'tare ducawaacãrã niwã. Na Israe curuacjãrãrẽ ducawaáaca be'ro na ye di'ta tojacaro niwũ.

2 Õ'acũ Moisére di'tare ducawaaduti'caronojõta níbocase me'rã te nueve curaricjãrãrẽ, ape deco me'rã nirĩ curua quẽ'rãrẽ te di'tare ducawaacãrã niwã.

3-4 Moisé te di'tare mujĩpũ mujãtiro dia Jordãpũ na pua curuacjãrã Rubén, Gad, tojo nicã Manasés deco me'rã nirĩ curuacjãrãrẽ o'otojacu

nimiwĩ. Tojo wéeca be'ro nimicã, José yarã pe'e p̄na curuap̄n d̄ucawaticãrã niwã. Na Manasés ya curua, tojo nicã Efraĩ ya curua nicãrã niwã. Pa'ia Leví ya curua pe'ema di'tare o'oticãrã niwã. Mejõ macãrĩrẽ, cã'rõ di'ta nisenojõacãrẽ wa'icurã na tá ba'anu'cũatjo nirõ ejatuario o'ocãrã niwã.

⁵ Õ'acũ Moisére duti'caronjõta Israe curuacjãrã Canaá di'tare d̄ucawaacãrã niwã.

Caleb ya di'ta cjase ni'i

⁶ Judá ya curuacjãrã ʘm̄na Gilgap̄n Josué me'rã ucũrã wa'acãrã niwã. Caleb, cenezeo masũ, Jefone macũ, Josuére a'tiro nic̄n niwĩ: “Cades-barneap̄n Õ'acũ Moisére ní'quere wãcũña. Cũ marĩ p̄narã ye cjasere niwĩ.

⁷ Moisé yu'u ti macãp̄n ní'cure Canaá di'tare ĩ'acusiaḡn o'ócterore cuarenta cũ'marĩ c̄ow̄n. ĩ'adajaḡn, ya'yioro marĩrõ diacjũ nise me'rã yu'u ĩ'a'quere cũrẽ werew̄n.

⁸ Yu'u me'rã wa'a'cãrã pe'e masãrẽ uisãwã. Yu'u p̄rĩcã nipe'tise yu'u wãcũ, ĩjõpeose me'rã Õ'acũ narõ weew̄n.

⁹ Tojo weeḡn Moisé Õ'acũ tu'orop̄n yu'ure a'tiro niwĩ: ‘M̄u'u Õ'acũ dutiro queoro weenu'cũwã. Tojo weeḡn Canaá di'tap̄n m̄u'u u'tacũusija'caro ejatuario m̄u'u ye nirõsa'a. Tojo nicã m̄u'u p̄rãmerã nituriarã ye di'ta nirõsa'a', niwĩ.

¹⁰ Õ'acũ Moisére tojo ní'que cuarenta y cinco cũ'marĩ yu'rutojaw̄n. Israe curuacjãrã marĩ yuc̄n marĩrõp̄n sijãcterore tojo niwĩ. Cũ

ní'caronojōta te cū'marĩrē yu'ure catise o'owĩ. Ni'cārōacā ochenta y cinco cū'marĩ cū'o'o.

11 Tojo nimigũ, Moisé yu'ure a'ti di'tare ĩ'adu'tidutigũ o'ócatero weronojō tutua ni'i yu-jupũ. Titare yu'u a'mewējētutua'caro weronojō mejārōta tu'oña'a.

12 Tojo weegũ ni'cārōacā opa bu'papijaro nirōrē, Ō'acũ yu'ure o'oguti ní'que di'tare o'oya. Tita me'rã tocjãrã ye cjasere mu'u tu'owũ. Masã pacarã Anac pārãmerã nituriarã topũ niwã. Tojo nicã, na ye macãrĩ pacase macãrĩ, añurō bi'a cã'mota'a'que macãrĩ niwũ. Tojo nimicã, Ō'acũ cū weetamurō me'rã, cū ní'caronojō narē na ye macãrĩrē nũrãwĩrōgũti", nicũ niwĩ.

13 Tojo weegũ, Josué Caleb, Jefone macũrē "Añurō wa'ato" ni, Ō'acũrē sērĩbosacũ niwĩ. Be'ro Hebrō macãrē cũrē, cū pārãmerã nituriarãrē o'ocũ niwĩ.

14 Ti nũmũ me'rã ti macã Hebrō Caleb, cū pārãmerã ya macã, a'tiro nicã quē'rãrē nidecoti'i yujupũ. Cũ Ō'acũ Israe curuacjãrã wiogũ dutisere queoro weeme'rĩ'cũ niyucã, tojo niwũ.

15 Duporo cjase wãme Hebrō Quiriat-arba wãmeticarō nimiwũ. Arba ãpērã Anac pajigũjo pārãmerã nituriarã yu'rũoro niyu'rũnũ'cãcũ niwĩ.

A'te be'rore ti di'tapũre ne a'mewējēse marĩcaro niwũ majã.

15

Josué Judá ya curuacjãrãrē di'ta o'o'que ni'i

1 Níbocase me'rã Judá ya di'ta sur niburuaropu boca'que Edom di'ta nituoropu, téé yucu marĩõ, masã marĩõ Zin wãmetiropu nituocaró niwã.

Caleb Hebrõ, tojo nicã Debir macãrĩrẽ cã miiwapa'que ni'i

13 Ô'acũ cã “Tojo weeya” ní'caronojõta Josué Caleb, Jefone macãrẽ ni'cã di'ta Judá ya curuacjãrãrẽ opa bu'papijaro ní'carore o'ocu niwĩ. Cũ o'o'que di'ta Quiriat-arba nicaro niwã. Be'ro ti macãrẽ Hebrõ pisucãrã niwã. Ti macã Anac pajigu, u'muagũjo pãrãmerã nituriarã niyu'rũnu'cãrĩ macã nicaro niwã.

14 Hebrõ macãpu ní'cãrãrẽ Caleb i'tiarã Anac pãrãmerã nituriarãrẽ aperopu cõ'aõ'ocu niwĩ. Na a'ticurã nicãrã niwã: Sesai, Ahimán, tojo nicã Talmai nicãrã niwã.

15 Topu ní'cuta majãa, Debir macãcãrã me'rã a'mewējēgũ wa'acu niwĩ. Ti macãta toduporopure Quiriat-sefer wãmeticaró nimiwã.

16 Caleb a'tiro nicu niwĩ: “No'o ni'cũ umu Quiriat-sefer macãrẽ a'mewējē miiwapagure yu'u macõ Acsare numisoguti”, nicu niwĩ.

17 Tere cã tojo nicã tu'ogu, Otoniel, Cenaz macũ, Caleb acabiji macũ Quiriat-sefer macãrẽ a'mewējē, miiwapa wa'acu niwĩ. Tu'ajanu'cõ, Caleb cã macõ Acsare Otonierẽ numisocu niwĩ.

18 Co cã tiropu etacã, Otoniel core “Di'ta marĩ oteatjere sãrĩña”, nicu niwĩ. Co pe'e “Jau”, ni yu'tico niwõ. Acsa burro bu'ipu pesa'co dijacã, co pacu Caleb core sãrĩtiña'cu niwĩ:

—Macõ, ¿ñe'enojõrẽ mu'u uati?

19 —Pacũ, mu'u yu'ure weetamuña. Neguev yucũ marĩõpũ yu'ure di'ta o'otojapũ. Ni'cãrõacãma majã aco wijase peri nise di'tare o'oya, nico niwõ.

Tojo weetjãgũ, Caleb cũ macõrẽ u'muase bu'papũre, tojo nicã bu'aro aco wijase di'ta nirõpũre o'ocũ niwĩ.

63 Judá ya curuacjãrã nituriarã pe'e Jerusalẽpũ nirã jebuseo masãrẽ cõ'awĩrõmasĩticãrã niwã. Tojo weerã na ni'cãrõacãpũ quẽ'rãrẽ Judá pãrãmerã nituriarã me'rã nidecotisama yujupũ.

16

Josué Manasés ya curuacjãrãrẽ, tojo nicã Efraí ya curuacjãrãrẽ di'ta o'o'que ni'i

4 José pãrãmerã nituriarã Manasés ya curuacjãrã, tojo nicã Efraí ya curuacjãrã narẽ o'o'que di'tare ñe'ecãrã niwã.

10 Efraí ya curuacjãrã pe'e Gezer macãpũ nirã cananeo masãrẽ cõ'awĩrõticãrã niwã. Tojo weemirã, narẽ upũtu waro tutuaro da'rase du-tipecãrã niwã. Ni'cãrõacã quẽ'rãrẽ na tiropũta nidecotima yujupũ.

17

José pãrãmerã nituriarã na di'ta ñe'e'que ni'i

14 José pārāmerā nituriarā Manasés ya curuacjārā, tojo nicā Efraí ya curuacjārā Josuére a'tiro nicārā niwā:

—¿De'ro weegu ũsārē ũsā ye niatjere ni'cā di'tacāta o'oati? Ũsārē ejatuatu'sawe'e. Ō'acū ũsārē añurō wéégu, pājārā masāputicā weemi, nicārā niwā.

15 Na tojo nicā tu'ogu, Josué narē yu'ticu niwī:

—Mūsā pājārā ni'i nírā, mūsārē o'óca di'ta Efraí, bu'papijaro nirō ejatuaticā, ferezeo masā, tojo nicā refaíta masā ya di'ta yucupagu pejepagu nirōpu wa'aya. Wa'a, tere paa, ote, topu nisetiya, nicu niwī.

16 Na cūrē yu'ticārā niwā:

—Diacjūta ni'i. A'te bu'papijaro nirō ũsārē ejatuatisa'a. Mejō cananeo masā opa pa'tiro nirōpu nirā pe'e pejepawu cabayua wejese pawu cōme me'rā wee'quepawure cuoma. Bet-seāpu nirā, to sumuto nise nirā, tojo nicā Jezreel opa pa'tiro nirā quē'rā mejārōta cuoma, nicārā niwā.

17 Na tojo nicā tu'ogu, Josué José pārāmerā nituriarā Efraí, Manasés ya curuacjārārē nicu niwī:

—Diacjūta mūsā pājārā, tutuarā ni'i. Tojo weerā ni'cā di'ta dia'cū cuomasītisa'a.

18 Opa bu'papijaro, yucupagu peje nirō quē'rā mūsā ye nirōsa'a. Mūsā tepagure paacō'a, no'ocā'rō mūsā paacō'arō pōtēorō te mūsā ye di'ta nirōsa'a. Sōjā cananeo masā, cōme me'rā wee'quepawure cuomicā, na tutuamicā, narē nūrūstewīrōmasīrāsa'a, nicu niwī Josué.

18

Israe curuacjārã di'ta ñe'eti'cārãrẽ ducawaa'que ni'i

¹ Israe curuacjārã ti di'tacjārãrẽ docaque'acã wéeca be'rore nipe'tirã Silo macãpũ nerēcãrã niwã. Topũta Õ'acũ wi'i, wa'icũrã caseri me'rã wéeca wi'ire apo, nerẽwãacãrã niwã. Ti wi'i Õ'acũrẽ na ëjõpeo, ucũrĩ wi'i nicaro niwã.

² Titare siete curari na di'ta o'o, ducawaasere ñe'eticãrã niwã yujupũ.

³ Tojo weegũ Josué Israe curuacjārãrẽ nicũ niwĩ: “¿No'ocã'rõ yoacã te di'tare mũsã ñe'erãtirã co'terãsari? Te di'ta Õ'acũ mũsã ñecũsumũa ëjõpeogũ mũsãrẽ o'o'que ni'i.

⁴ Te curarinũcũ i'tiarã umũa bese, o'óya. Yũ'u narẽ na ye di'ta 'To nitũo'o', ni ï'abesedutigũ, o'ógutigũ wee'e. Na ï'áca be'ro 'Tocã'rõ ùsã ye di'ta nitũopũ', ni ojarãsama. Tu'ajanũ'cõ, dajatojatirã,

⁵ siete di'ta ducawaanũ'cõato. Judá ya curuacjārã ye di'ta sur pe'e tojarosa'a. José ya curuacjārã nituriarã ye di'ta pe'e norte pe'e tojarosa'a.

⁶ Mũsã siete di'tare ducawááca be'ro yũ'ure te oja'quere miitia. Be'ro yũ'u marĩ wiogũ Õ'acũ ï'orõpũ bese, níbocase me'rã mũsãrẽ 'Topũ tojarãsa'a', ni cũugũsa'a.

⁷ 'Leví ya curuacjārã pũrĩcã ne cã'rõ di'ta ñe'esome' nisere masĩtojasama. Te ñe'erõnojõ o'orã, náma Õ'acũ ye cjasere da'ratje nirõsa'a. Tojo nicã Gad, Rubén, deco me'rã nirã Manasés ya curuacjārã pũrĩcã na ye di'ta niatjere

ñe'etojacārã niwã. Na ye di'ta Jordã mujĩpũ mąjãtiro ape pã'rẽ pe'e ni'i. Moisé Õ'acũ ıaro weeco'tegũ te di'tare narẽ o'otojacũ niwĩ", nicũ niwĩ.

⁸ Na ıııua te di'tare añurõ ĩ'abese, "To niapũ" ni, na aporã wa'arãtirã weeri cura Josué pe'e a'tiro weeduticũ niwĩ: "Nipe'tiro a'ti di'tare ĩ'asijabi'arã wa'a, 'A'tiro bajuri di'ta ni'i', ni ojarã wa'aya. Tu'ajanũ'cõ, yũ'ı tiropũ tojatia. Be'ro a'ti macã Silopũ Õ'acũrẽ '¿De'ro wee a'ti di'tare nı́bocase me'rã dı́cawaagusari?', ni sērĩgũti", nicũ niwĩ.

⁹ Tojo weerã na ıııua Josué cũ weeduti'caronojõta queoro weecārã niwã. Na Silopũ dajarã, ti di'tare na "To niapũ" ni, na oja apo'quere miidajacārã niwã. Macãrĩnũcũrẽ "To niapũ", nicārã niwã. Te na dı́cawaa'quere siete curari cjasere na oja'quere miidajacārã niwã.

¹⁰ Topũre Josué Õ'acũ ĩ'orõpũre "¿Noarẽ te di'ta tojarosari?" ni, nı́bocase me'rã dı́cawaacũ niwĩ. Tojo weegũ Israe curuacjãrãrẽ na di'ta niatjere nanũcũ o'o, dı́cawaanũ'cõcũ niwĩ.

Josué Benjamí ya curuacjãrãrẽ di'ta o'o, dı́cawaa'que ni'i

¹¹ Dı́cawaanũ'cõ, Benjamí ya curuacjãrã na nise curarinũcũrẽ o'onũ'cãcũ niwĩ. Õ'acũ "A'ti di'ta narẽ o'oya", ni ĩ'óca be'ro na niatje di'tare o'ocũ niwĩ. Te di'ta Judá ya curuacjãrã wa'tero, tojo nicã José ya curuacjãrã wa'tero tojacaro niwũ.

19

Simeó, Zabuló, Isacar, Aser, Neftalí, Dan na ye curarinucũcjārārē di'ta o'o, dɛcawaa'que ni'i

¹ Benjamí ya curuacjārā be'rore Simeó ya curuacjārā na niatje di'tare o'ocɥ niwĩ. Te curarinucũ o'ono'cārā niwā. Te di'ta Judá ya di'ta wa'teropɥ tojacaro niwũ.

¹⁰ Na pɥa curuacjārā be'rore Zabuló ya curuacjārā, na niatje di'tare o'ocɥ niwĩ. Ti di'ta téé Sarid wāmetiri macāpɥ nituocaró niwũ.

¹⁷ Na i'tia curua be'rore Isacar ya curuacjārārē, na niatje di'tare o'ocɥ niwĩ.

²⁴ Te ba'paritise curaricjārā be'rore Aser ya curuacjārārē, na niatje di'tare o'ocɥ niwĩ.

³² Ni'cāmocɥse curaricjārā be'rore Neftalí ya curuacjārārē, na niatje di'tare o'ocɥ niwĩ.

⁴⁰ Seis curaricjārā be'rore Dan ya curuacjārārē, na niatje di'tare o'ocɥ niwĩ.

Josué ya di'ta cjase ni'i

⁴⁹⁻⁵⁰ Be'ro te di'tare etíca be'ro, Israe curuacjārā Ō'acũ duti'caronojōta Josuére cũ niatji macārē o'ocārā niwā. Ti macā cũ sērĩca macā Timnat-sera, Efraí ya di'ta opa bu'papijaropɥ nicaro niwũ. Topɥ ti macārē apaturi apo, nisetiɥ niwĩ.

⁵¹ A'tiro wee pa'i Eleazar, Josué, tojo nicā nipe'tise curaricjārā wiorā te di'tare

dɔcawaanɯ'cōcārã niwã. Silopɯ Õ'acũ wi'i, su'ti caseri me'rã wéeca wi'i sope pu'topɯ “Õ'acũ, ¿noanojörë ti di'ta tojarosari?” nívocaca be'ropɯ eticārã niwã. Tojo weero na eti'que queoro dɔcawaanɯ'cōno'caro niwã.

20

Wãcũña marĩrõ apĩ masũrẽ wějẽca be'ro cũ du'ti nisetiatje macãrĩ cjase ni'i

¹ Õ'acũ Josuére a'tiro nicɯ niwĩ:

² “Mɯ'ɯ Israe curuacjārãrẽ masã du'ti nisetiatje macãrĩrẽ besedutiya. Yɯ'ɯ Moisére weeduti'caronojõta weeya.

³ Tojo weeyucã, no'o wãcũña marĩrõ apĩrẽ wějẽgãnojo te macãrĩpɯ du'tiwã'cãmasĩsami. Tojo weegɯ wějẽno'cɯ acaweregɯ waro cūrẽ wějẽa'merĩ nígũ, topɯ du'ti, nicã'masĩsami.

⁴ Tojo wee masũ te macãrĩpɯ du'tiagɯnojo ne sãjãrĩ sopepɯ etagɯ, tocjãrã bucurãrẽ ‘Tojo weeasɯ’, ni weregusami. Tojo wéeca be'ro bucurã ‘A'to tojayá’, nirãsama. Tojo nicã, cũ nisetiatji wi'ire cūurãsama.

⁵ Wějẽ'cure wějẽa'merĩ masũ cūrẽ ti macãpɯ sirutucãma, na bucurã cūrẽ nɯo cɯorãsama. Cũ uase, wãcũña marĩrõ ‘Tojo weeapɯ’ ni wéréca be'ro niyucã, tojo wa'arosa'a.

⁶ Na weresãno'cɯ ti macãpɯ du'ti, nicã'bosami téé nipe'tirã ti macãcjãrã masã nerẽ beséca be'ro yɯ'rɯwetigusami. Tojo nicã pa'ia wiogɯ cũ wěrĩcãpɯ topɯ nituogusami. A'tiro wa'áca be'ro cũ, cũ ya wi'ipɯ, cũ ya macã, cũ uiwijaca macãpɯ dajagusami tja”, nicɯ niwĩ.

⁷ Õ'acũ Josuére tojo nicã tu'orã, na du'ti niatje macãrĩ Galileapu nirĩ macã Quedes wãmetiri macãrẽ besecãrã niwã. Ti macã Neftalí ye di'ta ãrũpagu pijaropu tojacaro niwũ. Ape macã Siquem Efraí ye di'ta ãrũpagu pijaropu tojacaro niwũ. Nitũori macãpua majã Quiriat-arba nicaro niwũ. Ti macãrẽta tja na Hebrõ pisusama. Judá ye di'ta ãrũpagu pijaropu tojacaro niwũ.

⁸ Mujĩpũ mujãtiro dia Jordã siaquiji pe'ema i'tia macã na du'ti niatje macãrĩrẽ besecãrã niwã. Nimũ'tãrĩ macã Beser nicaro niwũ. Ti macã Rubén ye di'ta opa bu'pa, yucu marĩrõpu tojacaro niwũ. Ape macã Ramot, Galaad na nino'rõpu, Gad ye di'tapu tojacaro niwũ. Nitũori macãpua Golán nicaro niwũ. Basán na nino'rõpu Manasés ya curuacjãrã nirõpu tojacaro niwũ.

⁹ Tojo weerã nipe'tirã Israe curuacjãrã, tojo nicã apesecjãrã na me'rã nirã no'o wãcũña marĩrõ wẽjẽgũnojõ te macãrĩpu du'tita basiocaro niwũ. Na te macãrĩcjãrã pãjãrã nerẽ beseatji duporo tojo weeta basiocaro niwũ. Tojo weeticãma, cãrẽ wẽjẽa'mebosama nĩrã, tojo weeno'caro niwũ.

21

Leví ya curuacjãrã ye macãrĩ cjase ni'i

¹⁻² Leví ya curuacjãrã wiorã Silopu pa'ia wiogu Eleazar, Josué, ãpẽrã Israe curuacjãrã wiorã me'rã ucũrã wa'acãrã niwã. Silo Canaá di'tapu nicaro niwũ. Topu Leví ya curuacjãrã wiorã narẽ a'tiro nicãrã niwã: “Õ'acũ Moisé me'rã ãsãrẽ ãsã

niatje macãrĩrẽ o'oduticũ niwĩ. Tojo nicã, di'ta te macãrĩ sumutopũ ãsã wa'icũrãrẽ eca nisetiatjere o'oduticũ niwĩ”, nicãrã niwã.

³ Tojo nicã tũ'orã, Õ'acũ cũ duti'caronojõta Israe curuacjãrã na ye di'ta cũo'quere Leví ya curuacjãrãrẽ queoro o'ocãrã niwã. Tere o'orã, macãrĩ, tojo nicã cãpũpũ na wa'icũrãrẽ eca nisetiatjere o'ocãrã niwã.

⁴¹ Tojo weerã Israe curuacjãrã ye di'tapũre Leví ya curuacjãrã cuarenta y ocho macãrĩ, tojo nicã na cãpũpũ wa'icũrãrẽ eca nisetiajere ñe'ecãrã niwã.

⁴² Te macãrĩ nipe'tisepũreta tja sumutopũ wa'icũrã na eca nisetiatje di'ta nibajaque'acaro niwũ.

⁴³ Õ'acũ nipe'tise na ñecũsumuarẽ “A'tiro o'ogũti” ní'que di'tare queoro o'ocũ niwĩ. Tojo weerã na te di'tare ñe'e, topũ niseticãrã niwã.

⁴⁴ Tere wéégũ, nipe'tise Õ'acũ cũ “Weeguti” ní'quere queorota weecũ niwĩ. Nipe'tiro ti di'tapũ narẽ soose o'ocũ niwĩ. Õ'acũ weeta-murõ me'rã Israe curuacjãrã narẽ ã'atu'tirãrẽ docaque'acã weecũ niwĩ. Tojo weerã Israe curuacjãrãrẽ ne mejẽcã weemasĩticãrã niwã.

⁴⁵ Õ'acũ nipe'tise cũ “Weeguti” ní'quere queorota weecũ niwĩ. Ne ni'cãrõ weedũ'a weeticũ niwĩ; weepe'ocã'cũ niwĩ.

22

Rubén, Gad ye curaricjãrã, Manasés ye curaricjãrã deco me'rã nirã dia Jordã ape pã'rẽpũ na

dajatojaa'que ni'i

¹ Be'ro ti di'tare etipe'otoja, Josué Rubén ya curuacjārārē, Gad ya curuacjārārē, tojo nicā Manasés ya curuacjārā deco me'rā nirārē piji, narē

² nicu niwī: “Musā nipe'tise Moisé, Õ'acũ dutisere da'raco'tegu cũ duti'quere queoro weepu. Tojo nicā nipe'tise yu'u musārē wee-duti'quere weepu.

³ Ne ni'cāti musā acawererā Israe curuacjārārē cō'awā'cā weetiapu. Narē weetamunu'cũcã'pu. Ni'cārōacã quē'rārē na me'rā ninu'cũ'u yujupu. Tojo nicā nipe'tise Õ'acũ, musā wiogũ cũ dutisere añurō weepe'oapu.

⁴ Ni'cārōacãma Õ'acũ cũ ‘Tojo weeguti' ní'quere queoro weeami. Tojo weegu musā acawererārē soocã weeami. Tojo weerã musã ye di'ta Moisé, Õ'acũ dutisere da'raco'tegu, musārē o'o'que di'ta, Jordã ape pã'rēpu nisepu dajatojaaya majã.

⁵ A'te dia'cũ musã weecã uasa'a. Moisé cũ duti'quere queoro weeya. Õ'acũ marĩ wiogure ma'i nisetiya. Cũrē sirutu, cũ dutisere queoro weeya. Nipe'tise musã ějōpeose me'rã, musã wãcũse me'rã cũ uaro weenu'cũcã'ña”, nicu niwī Josué.

⁶ Narē werepe'otoja, “Õ'acũ musārē añurō weeato” ni, “Musã ye wi'seripu dajatojaaya”, nicu niwī.

⁹ Cũ tojo nica be'ro Rubén ya curuacjārã, Gad ya curuacjārã, Manasés ya curuacjārã deco me'rã nirã ãpērã Israe curuacjārã Silopu nirã,

Canaá di'tapure a'merĩ du'u, ducawati, na ya di'ta Galaad, dia Jordã apese pã'rẽpũ pẽ'ape'tia wa'acãrã niwã. Dũporopũ te di'ta Ô'acũ Moisé me'rã “Mũsãrẽ o'ogũti” ní'que di'ta nicaro niwũ.

23

Josué masãrẽ cũ werecasatũo'que ni'i

¹ Peje cũ'marĩ Ô'acũ Israe curuacjãrãrẽ narẽ ï'atu'tirã me'rã a'mewẽjẽ, soo nisetica be'ro yũ'rũcaro niwũ. Titare Josué bũcũ ãjãgũ,

² nipe'tirã Israe curuacjãrã bũcũrãrẽ, wiorãrẽ, beserĩ masãrẽ pijionũ'cõ, narẽ werecasatũocũ niwĩ. A'tiro nicũ niwĩ:

“Yũ'u bũcũ waro ãjã'a.

³ Mũsã nipe'tise Ô'acũ a'ti di'tacjãrã mũsãrẽ ï'atu'tirã wee'quere ï'apã. Cũta mũsã ye niatjere a'mewẽjẽtamuwĩ.

⁴ Yũ'u mũsã nipe'tirãrẽ to di'ta nĩbocase me'rã nipe'tise curarire Ô'acũ ï'orõpũ dũcawaawũ. Yũ'u mũsã te di'tare a'mewẽjẽ wapata'a'quere dũcawaawũ. Tojo nicã apeye di'ta a'mewẽjẽ wapata'ano'ña marĩ'que quẽ'rãrẽ dũcawaawũ. Mujĩpũ mujãtiro dia Jordã me'rã nũ'cã, téé mujĩpũ sãjãrõ maajo Mediterrãneo me'rãpũ dũcawaatũowũ.

⁵ Ô'acũ masã te di'tapũ nirãrẽ cõ'awĩrõgũsami. Mũsã pe'e te di'tare miwaparãsa'a. Ô'acũ mũsã wiogu cũ ‘Tojo weegũti’ ní'caronojõta weegũsami.

6 "Tojo weerã wãcūtutuaya. Nipe'tise Moisé oja'quere, cã dutise cūu'quere queoro weeme'ricã'ña.

7 Mũsã âpērã masã, cõ'awĩrõno'ña marĩrã a'ti di'tapũ du'sarã me'rã ne a'mesũ'aticã'ña. Na êjõpeorãrẽ Õ'acũ nitirãrẽ ne cã'rõacã êjõpeo, ejaque'aticã'ña. Na wãmerẽ pisu, wãmepeoticã'ña.

8 Õ'acũ ni'cũrẽta cũ ɥaro wee, êjõpeonu'cũcã'ña. Mũsã ni'cãrõacã weronojõta tojota añurõ weeyapaticã'ña.

9 Õ'acũ peje curaricjãrãrẽ na tutuamicã, mũsã ï'orõpũ cõ'awĩrõwĩ. A'tocateropũ quẽ'rãrẽ ne ni'cã curua mũsarẽ a'mewẽjẽpõtẽowe'e.

10 Õ'acũ cũ ní'caronojõta mũsarẽ a'mewẽjẽtamuwĩ. Tojo weegũ cũ weetamuse me'rã mũsã me'rãcjũ ni'cũ mil masãrẽ nurũstemasĩsami.

11 Tojo weerã mũsã tu'omasĩña. Õ'acũ mũsã wiogũre queoro ma'inu'cũcã'ña.

12 Mũsã Õ'acũ dutisere yũ'rũnũ'cã, na mũsã wa'teropũ du'sarã me'rã a'mesũ'a, nũmoticã pũricãrẽ,

13 Õ'acũ marĩ wiogũ narẽ cõ'anemosome majã. Na du'sarã mũsarẽ ña'arõ wa'acã weerãsama. A'ti di'ta añurĩ di'ta Õ'acũ marĩrẽ o'óca di'tare ê'magũsami. A'ti di'tapũre ninemosome majã.

14 "Masã nipe'tirã wẽrĩwũaronojõ cã'rõacã be'ro yũ'u wẽrĩgũsa'a. Mũsã êjõpeose me'rã, mũsã wãcũse me'rã Õ'acũ cũ queoro wee'quere añurõ masĩ'i. Ne ni'cãrõ Õ'acũ marĩ wiogũ cũ 'Añurõ weeguti' ní'quere weeticã weetiwĩ.

Nipe'tisere weepe'ocã'wĩ.

¹⁵ Musã cūrẽ yu'rũnu'cãcã pũrĩcã, cũ musãrẽ añurõ wee'caro weronojõ mejãrõta peje ña'ase musãrẽ wa'acã weegusami. Ne ni'cũ a'ti di'ta añurĩ di'ta, marĩrẽ o'óca di'tapũ tojasome.

¹⁶ Musã Õ'acũ marĩ wiogũ me'rã apo'quere yu'rũnu'cãcã, ãpẽrãnojõrẽ ejaque'a ejõpeocã, Õ'acũ musã me'rã uagusami. A'ti di'ta añurĩ di'ta marĩrẽ o'óca di'tapũ ninemosome majã", nicũ niwĩ Josué.

24

Josué cũ weretũo'que ni'i

¹ Be'ro Josué Siquẽpũ nipe'tise curari Israe curuacjãrãrẽ neocũ niwĩ. Bucurãrẽ, wiorãrẽ, beseri masãrẽ, masãrẽ sũ'ori nirãrẽ pijineocũ niwĩ. Na Õ'acũ ĩ'orõpũ nerẽcãrã niwã.

² Tu'ajanũ'cõ, Josué narẽ nicũ niwĩ:

—Õ'acũ marĩ Israe curuacjãrã wiogũ a'tiro nimi: “Duporopure musã ñecũsumã Taré, tojo nicã cũ põ'rã Abrahã, Nacor dia Éufrates wãmetiri maa yu'rũropũ nisetiwã. Topũ níã, ãpẽrãnojõrẽ ejõpeosetiwã.

³ Musã ñecũ Abrahã ti maa yu'rũropũ ní'cure, mia weetjãgũ, nipe'tiro a'to Canaá di'tapũ sũ'ori sijawũ. Cũrẽ pãjãrã masãputicã weewũ. Cũ ne waro põ'rãtigure Isaare o'owũ.

⁴ Cũ Isaare tja cũ põ'rã pũarã Jacob, Esaúre o'owũ. Esaúre di'ta opa bu'papijaro Seir wãmetiri di'tare cũuwũ. Jacob pe'e cũ põ'rã me'rã Egiptopũ bu'awã.

5 "Be'ro Moisére, Aarõrẽ to Egiptoputa o'ówu. Yu'u tutuaro me'rã wee'quere tocjãrã Egiptocjãrãrẽ ña'arõ wa'acã weewu. Tu'ajanu'cõ, müsãrẽ topu ní'cãrãrẽ miiwijawu.

6 Müsã ñecũsumua Egiptopu wijacã, Egiptocjãrã na yarã cabayua me'rã, na cabayua wejesepawu me'rã narẽ wějẽsĩ'rĩrã sirutuwã. Téé Maa sõ'arĩ maa tiropu sirututuowã.

7 Müsã ñecũsumua yu'u weetamusere uarã, yu'ure sãrĩwã. Na tojo weecã, yu'u Egiptocjãrãrẽ cã'mota'adutigu, Israe curuacjãrã, Egiptocjãrã decopu na'itĩ'asere cūuwũ. Tojo weerã Egiptocjãrã narẽ ĩ'abocatiwã. Tojo nicã, Egiptocjãrã maarẽ pẽ'arĩ curare, narẽ mirĩcã weewu. Müsã basu yu'u Egiptocjãrãrẽ wee'quere ĩ'amiwãba.

"Müsã Egiptopu wijáca be'ro peje cũ'marĩ yucu marĩrõpũre nicã'wũ.

8 Be'ro müsãrẽ amorreo masã ya di'ta, dia Jordã mujĩpũ mujãtiropu miipẽ'atiwu. Topu müsã me'rã a'mewějẽmiwã. Yu'u pe'e müsãrẽ narẽ docaque'acã weewu. Tojo weerã na ye di'ta nimi'quere müsã miiwapawu.

9 Be'ro Balac, Zipor, moabita masã wioꝝ macũ, müsã me'rã a'mewějẽsĩ'rĩmiwĩ. Balac apĩ Balaã, Beor macũrẽ müsãrẽ dojadutigu pijidutiwĩ.

10 Yu'u pe'e Balaã müsãrẽ dojasĩ'ricã, cã'mota'awu. Müsãrẽ dojaronojõ o'ogũ, 'Narẽ añurõ wa'ato' ni, yu'ure sãrĩwĩ. Tojo wee müsãrẽ yu'ruweticã weewu.

11 "Be'ro müsã dia Jordãrẽ pẽ'awũ. Pẽ'aa, Jericõpu etawu. Ti macãcjãrã müsã me'rã a'mewějẽmiwã. Tojo nicã, ãpẽrã ti di'tacjãrã

amorreo, ferezeo, cananeo, hitita, gergeseo, heveo, jebuseo masã mejãrõta musã me'rã a'mewëjẽwã. Yu'u musãrẽ nipe'tirãrẽ do-caque'acã weewu.

12 Sõjã amorreo masã wiorã puarãrẽ musã di'pjĩrĩ, buacatjẽ me'rã docaque'acã weetiwu. Yu'u pe'e narẽ uise da'rewu. Tojo weerã musã na tiropu etati dũporo uiwã'cãtojawã.

13 Musã di'tare da'ratimicã, ãpẽrã na da'ra'que di'tapure musãrẽ o'owu. Tojo nicã macãrĩ musã da're'que mejẽtare o'owu. Musã te macãrĩpu niseti, u'se weseri, tojo nicã olivo weseri musã oteti'que dũcare ba'a'a", ni werecu niwĩ Õ'acũ.

14 Be'ro Josué a'tiro ninemocu niwĩ:

—Tere wãcũrã, wiopesase me'rã, diacjũ nise me'rã, Õ'acũrẽ ëjõpeo, cã dutiro weeya. Õ'acũ nitirãrẽ marĩ ñecũsumua dia Éufrates yu'rũropu, tojo nicã Egiptopu ëjõpeo'cãrãrẽ ëjõpeodu'u, cõ'acã'ña. Õ'acũ dia'cũrẽ ëjõpeoya.

15 Musã Õ'acũrẽ ëjõpeo sirututu'satirã pũricã, musã basu ëjõpeoajãrẽ beseya. Marĩ ñecũsumua Éufrates yu'rũropu ëjõpeo'cãrãrẽ, o amorreo masã, a'ti di'tapũ nirã na ëjõpeorãrẽ ëjõpeosĩ'rĩrã, narẽ beseya. Yu'u pũricã, ya wi'icjãrã quẽrã Õ'acũrẽ ëjõpeo, cã dutiro weerãsa'a, nicu niwĩ Josué.

16 Cã tojo nicã tu'orã, masã a'tiro ni yu'ticãrã niwã:

—Ûsã Õ'acũrẽ ëjõpeodu'usome. ãpẽrã Õ'acũ nitirã pe'ema ne ëjõpeosirutusome.

17 Marĩ wioꝝũ Õ'acũ cũta marĩrẽ, marĩ ñecũsumua Egiptopũ ña'arõ yu'ru'cãrãrẽ miiwi-jawĩ. Cũta tja cũ tutuaro me'rã añuse cũ tutu-asere weeĩ'owĩ. Nipe'tiro ũsã ma'apũ a'ti'quere, peje macãrĩcãrã wa'teropũ yu'ru'quere mejẽcã wa'ari níꝝũ, co'tewĩ.

18 Cũ marĩ wa'acã, nipe'tise macãrĩcãrãrẽ cõ'awĩrõcã'wĩ. Amorreo masã, a'ti di'tacjãrãpũreta tojo weewĩ. ũsã quẽ'rã mu'u weronojõta Õ'acũrẽ ãjõpeo, cũ dutiro weerãsa'a. Cũta marĩ wioꝝũ nimi, nicãrã niwã.

19 Na tojo nicã tu'ogũ, Josué a'tiro nicũ niwĩ:

—Musã Õ'acũrẽ añurõ ãjõpeo, siru-tupõtẽosome. Cũ añugũ waro, ña'ase moogũ nimi. Cũ dia'cũrẽ marĩ ãjõpeocã uami. Æpẽrãnojõrẽ ãjõpeocã, doesami. Musã cũrẽ yu'runũ'cãcã, musã ña'arõ weesere nu'cãsome.

20 Musã Õ'acũrẽ ãjõpeodu'u, ãpẽrãrẽ ãjõpeocã, cũta musãrẽ ña'arõ wa'acã weegũsami. Musãrẽ añurõ wée'cu nimigũ, musãrẽ cõ'ape'ogũsami, nicũ niwĩ Josué.

21 Masã Josuére a'tiro ni yu'ticãrã niwã:

—Mu'u tojo níronojõ wa'asome. ũsã Õ'acũrẽ ãjõpeo, cũ dutiro weerãti, nicãrã niwã.

22 Na tojo nisere tu'ogũ, Josué nicũ niwĩ:

—Musã basu nipe'tirã tu'oropũ “Õ'acũrẽ ãjõpeo siruturãti”, niapũ.

Masã “Tojota niapũ”, nicãrã niwã.

23 Josué narẽ a'tiro ninemocũ niwĩ:

—To pũrĩcãrẽ ãpẽrãnojõ musã ãjõpeo yee'quere musã wa'teropũ cuosere cõ'ape'ocã'ña. Õ'acũ marĩ Israe curuacjãrã

wiogure nipe'tise musã añuse wãcũse me'rã
 ëjõpeoya.

²⁴ Masã Josuére a'tiro yu'ticãrã niwã tja:

—Ësã Õ'acũ marĩ wiogure ëjõpeo, siruturãti.
 Cũ dutiro weerãti, nicãrã niwã.

²⁵ Ti numuta topu Siquẽpu Josué masã me'rã
 “A'tiro weeguti”, ni apocu niwĩ. Narẽ na weese-
 tiatjere, narẽ dutiatjere cūucu niwĩ.

²⁶ Tere Õ'acũ dutise cūori turipu ojaõ'ocu
 niwĩ. Tere ojatoja, ni'cãgã ùtãgã pajicjare mi,
 yucugũ encina wãmeticju du'pocã Õ'acũ “Masã
 me'rã tojo weeguti” ní'quere cūori acaró tiropu
 nu'cõcu niwĩ.

²⁷ Nipe'tirã masãrẽ a'tiro nicu niwĩ:

—A'tiga ùtãgã nipe'tise Õ'acũ marĩrẽ
 ucũ'quere tu'ope'o'caro weronojõ a'topu toja'a.
 Tojo weerã musã Õ'acũ dutisere yu'rũnu'cã,
 musã queoro weetisere ï'ono'rõsa'a, nicu niwĩ.

²⁸ Tojo nitoja, Josué masãrẽ, na ye di'tapu
 nanucũrẽ dajatojaaduticu niwĩ.

Josué cũ wẽrĩ'que ni'i

²⁹ Cã'rõacã be'ro Josué, Nun macũ, Õ'acũ
 dutisere da'raco'tegu, ciento diez cũ'marĩ cuogu,
 wẽrĩa wa'acu niwĩ.

³⁰ Cũ ya di'ta Timnat-sera wãmetiri macãpu
 cũrẽ yaacãrã niwã. Ti macã bu'papijaro Efraĩ,
 ùrũgũ Gaas wãmeticju yu'rũropu nicaro niwũ.

³¹ Josué catiri curare, Israe curuacjãrã Õ'acũrẽ
 ëjõpeo, cũ dutiro weecãrã niwã. Cũ wẽrĩa be'ro
 bucũrã nipe'tise Õ'acũ Israe curuacjãrãrẽ añurõ

wee'quere masĩrã catiro põtëorõ tojota Õ'acũrẽ
 ëjõpeo, cã dutiro añurõ weesirutucãrã niwã.

Israe curuacjãrã José mijĩ õ'arĩrẽ yaa'que ni'i

³² José mijĩ cã õ'arĩ nimi'quere Siquẽpũ
 yaacãrã niwã. Te õ'arĩ Egiptopũ Israe curuacjãrã
 na miiti'que nicaro niwũ. Di'ta José pacũ mijĩ
 Jacob cã duu'que di'ta nicaro niwũ. Ti di'ta cien
 kujiri plata wãmetise kujiri Hamor põ'rã umuarẽ
 duucũ niwĩ. Hamor, Siquem pacũ nicũ niwĩ.
 Be'ro ti di'ta José pãrãmerã nituriarã ya di'ta
 tojaturiacaro niwũ.

Eleazar cã wẽrĩ'que ni'i

³³ Be'ro pa'i Eleazar, Aarõ macũ wẽrĩa
 wa'acũ niwĩ. Cũ wẽrĩcã, cã macũ Finees ya
 di'tapũ yaacãrã niwã. To Efraĩ ya di'ta opa
 bu'papijaropũ nicaro niwũ.

**Õ'âkã hi yeere uúkũri turi Tukano
New Testament in Tucano (BR:tuo:Tucano)**

copyright © 2009 Wycliffe Bible Translators, Inc.

Language: Tucano

Translation by: Wycliffe Bible Translators, Inc.

Tucano [tuo], Brazil

Copyright Information

© 2009, Wycliffe Bible Translators, Inc. All rights reserved.

This translation text is made available to you under the terms of the Creative Commons License: Attribution-Noncommercial-No Derivative Works. (<http://creativecommons.org/licenses/by-nc-nd/3.0/>) In addition, you have permission to port the text to different file formats, as long as you do not change any of the text or punctuation of the Bible.

You may share, copy, distribute, transmit, and extract portions or quotations from this work, provided that you include the above copyright information:

You must give Attribution to the work.

You do not sell this work for a profit.

You do not make any derivative works that change any of the actual words or punctuation of the Scriptures.

Permissions beyond the scope of this license may be available if you contact us with your request.

The New Testament

in Tucano

© 2009, Wycliffe Bible Translators, Inc. All rights reserved.

This translation is made available to you under the terms of the Creative Commons Attribution-Noncommercial-No Derivatives license 4.0.

You may share and redistribute this Bible translation or extracts from it in any format, provided that:

You include the above copyright and source information.

You do not sell this work for a profit.

You do not change any of the words or punctuation of the Scriptures. Pictures included with Scriptures and other documents on this site are licensed just for use with those Scriptures and documents. For other uses, please contact the respective copyright owners.

2020-12-01

PDF generated using Haiola and XeLaTeX on 18 Apr 2025 from source
files dated 31 Aug 2023

00ebd04f-7b0d-5a72-9407-eb53ae2bd086